

**SEVENTH LEGISLATIVE ASSEMBLY OF MIZORAM
(FOURTEENTH SESSION)**

LIST OF BUSINESS

FOR FIRST SITTING ON TUESDAY, THE 14th NOVEMBER, 2017
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. Pu LAL THANHAWLA, Hon'ble Chief Minister to make obituary references on the demise of the following dignitaries :

- 1) Pu ZAKHU HLYCHHO, Former Member of Legislative Assembly
- 2) Pu F. LALZUALA, Former Member of Legislative Assembly.
- 3) Col. LALCHUNGUNGA SAILO, Former Member of Legislative Assembly.

QUESTIONS

2. *Questions* entered in separate list to be asked and oral answers given.

ANNOUNCEMENT

3. THE SPEAKER to announce Panel of Chairmen

LAYING OF PAPERS

4. Pu LAL THANHAWLA, Hon'ble Chief Minister to lay on the Table of the House the Mizoram Parliamentary Secretaries (Appointment, Salaries, Allowances and Miscellaneous, Provisions)(Repeal) Ordinance, 2017.

5. Pu LALSAWTA, Minister to lay on the Table of the House the following :

- i) Report of the Director of Local Fund Audit on the Account of Local bodies (Village Council within Lunglei and Mamit District) for the accounting year ending 31st March, 2013.
- ii) Report of the Director of Local Fund Audit on the Account of Local bodies (Village Council within Serchhip District, MADC, and LADC) for the accounting year ending 31st March, 2014.
- iii) Report of the Director of Local Fund Audit on the Accounts of Local Authority (Village Council CADC, Serchhip District, Champhai District, Mamit District, Aizawl District, Lunglei District, Executive Secretary, CADC (including Village Councils), Secretary-cum-Development Officer, SHDC, Executive Secretary, LADC) for the accounting year ending 31st March, 2016.

**MOTION FOR ELECTION TO COMMITTEE ON
LOCAL FUND ACCOUNTS**

6. Pu R. ROMAWIA, Minister to move Motion for Election to Committee on Local Fund Accounts.

**MOTION FOR ELECTION TO COMMITTEE ON
PUBLIC UNDERTAKINGS**

7. Pu LALRINLIANA SAILO, Chairman, Committee on Public Undertakings to move Motion for Election to 2 (two) Members of Committee on Public Undertakings.

PRESENTATION OF REPORT

8. The Hon'ble Speaker to present to the House the Fourteenth Report of Business Advisory Committee.

LEGISLATIVE BUSINESS

Bills for introduction, consideration and passing

9. Pu LAL THANHAWLA, Hon'ble Chief Minister to beg leave of the House to introduce "The Mizoram Parliamentary Secretaries (Appointment, Salaries, Allowances and Miscellaneous Provisions) (Repeal) Bill, 2017."

ALSO

to introduce the Bill

to move that the Bill be taken into consideration

AND

to move that the Bill be passed.

10. Pu R. ROMAWIA, Minister to beg leave of the House to introduce "The Mizoram (Pension for Members of the Defunct Mizo District Council and of the Defunct Pawi - Lakher Regional Council) (Amendment) Bill, 2017."

ALSO

to introduce the Bill

to move that the Bill be taken into consideration

AND

to move that the Bill be passed.

11. Pi VANLALAWMPUII CHAWNGTHU, Minister to beg leave of the House to introduce "The Mizoram Cooperative Societies (Amendment) Bill, 2017."

ALSO

to introduce the Bill

to move that the Bill be taken into consideration

AND

to move that the Bill be passed.

NGURTHANZUALA
Commissioner & Secretary

....

S P E A K E R : Chhelna leh thlamuanna Pathian chuan, Krista Isua sawi angin rilru hmun khat pu tawnin awmtir che u rawh se.

Rom 15:6

Vawiinah hian zawhna hun kan la thei rih mai dawn lo va. Sun tur mi pathum kan nei a, chumite sunna hun chu kan hmang phawt ang a. Hun kan lak rei loh nan tunah Obituary Reference kan la ang a. Kan Chief Minister zahawm takin an pathum hian vawikhatah a sawi mai ang a. Pu Zakhu Hlycho, Pu F.Lalzuala leh Col.Lalchungnunga Sailo te sunna hun kan hmang dawn a. Kan House Leader Pu Lal Thanhawla, Chief Minister sawm ila. Aman rawn tan sela, tha a tih ang khan vawikhata chhiarchhuah vek a tih leh ama thu ni se. Hun pawh a kutah i pe mai ang.

Pu LAL THANHAWLA, CHIEF MINISTER : Pu Speaker, tun kan session-ah hian helai House-a kan lo thawhpui tawh thin, Council of Ministers-ah pawh ka lo thawhpui tawh te pathum lai sun tur kan han nei hi a pawh tak zet a, a lungchhiat thlak a. Amaherawhchu khawvelah kumhlun tur kan ni lo va. Chuvangin insunna hun a neih loh theih lo va. Pu Speaker, i remtih angin an pathum khan min kalsan dan indawtin an chanchin sunna tur tlem ka rawn sawi dawn a ni.

A hmasa berin Pu Zakhu Hlychho, kum 74 mi hi ex-Minister a ni a, 6th Sept tlai lam dar 1:30 khan luna leh BP sang avangin Civil Hospital, Aizawlah a boral a, kum 74 mi a ni.

Pu Zakhu Hlychho hi Amobyu Lal, Pu Laimo Hlychho (L) leh Pi Khuangchii (L) te fapa pahnhna niin 15th December, 1943 khan Maubawk, Saiha-ah a lo piang a. Pianpui unau mipa pakhat leh hmeichhe panga a nei a. May ni 29, 1971-ah Pi Suipari nen an innei a, fapa pakhat leh fanu panga a nei a, tu pali a nei bawk a ni.

Zirna lamah chuan Matric hi Mawkhar Christian High School, Shillong atangin a pass a. Kum 1967-ah St. Edmunds College, Shillong atangin B.A a zo leh a. Shillong-a a zir chung hian kum 1965-ah Regional Student Association (RSA) Vice President atan thlan tlin a ni a. RSA-a a nihna te bansan in 1965 vek hian Mara Students' Organisation a din a. He pawl hming, Constitution leh Motto pawh hi ama phuah leh duan a ni.

Kum 1968-1969 chung hian Mara rama High School hmasa ber Govt. Saiha High School-ah a thawk a. School a a thawh chung hian Mara fate Games & Sports leh Art & Culture lamah hmasawna rahbi thar a kaipui bawk a ni. Pu Zakhu Hlychho hi infiamna lamah pawh vantlang chunglam

niin a hunlai chuan Mara te zingah badminton leh hockey thiam bera sawi a ni thin.

Sports lam chauh ni lovin Pu Zakhu Hlychho hi Mara literature tih hmasawna kawnga sulsutute zing ami a ni. Khawvel puma Drama hriat lar tak leh hmingthang 'Hamlet' thawnthu pawh Mara tawngin kum 1968-ah let in Drama a lo chanpui tawh bawh a, a hunlai chuan a lar hle a ni.

Pu Zakhu Hlychho hi literature lamah pawh a duai lo hle a, heng lehkhabyte hi a ziaak a ni:

1. The 10 years of Maraland
2. Mara te Tobul
3. Mara ram Evangelical Kohhran leh a dintute
4. Thuthlung Thar Zawlawna
5. Mara te Nu te hi ama kutchhuak a ni.
6. Mara to English Translation Bu (tuna edit mek) Zirlaite hnena a thlawna sem tura a ruahman a ni.
7. 'Ka Tana Kohna Dar A Lo Rik Hunah Chuan' tih a boral huna publish tura amah ngeiin a buatsaih mek chu a ziah zawh hmam vanduaithlak takin min chawlsan ta a ni.

Zirtirtu hna a thawh lai hian ram mipuite ngenna leh ram tan hlawk zawka hna thawh theih inbeiseiin politics a luh chilh a. Hlawhtling takin nihna pawimawh tak tak a chelh a, chungte chu:

- Pawi-Lakher Regional Council Election-ah Tokalo bial atangin chuhtu awm lova thlantlin niin kum 1970-1972-ah P.L. Regional Council CEM-ah ruat a ni a, P.L. Region CEM tawp ber leh Mara te zingah a hmasa ber a ni.
- Mara te'n District Council hran, Lakher Autonomous District Council (LADC) an neih hnua inthlan hmasa ber 1972-ah Amobyu bial atangin thlantlin niin CEM-ah ruat a ni.
- Kum 1978 Election-ah thlantlin a ni leh a, EM niin Education Department a enkawl.
- Kum 1983-ah thlantlin leh niin MADC-a CEM hmasa ber a ni.

Pu Zakhu Hlychho hi ram a hruainaah a hlawhtling hle a. Kum 1993 MLA General Election-ah MNF party ticket in Siaha Constituency atanga thlantlin a ni a. A hnu lawkah Mara leh a bial mipuite tana tha zawk tur ngaihtuahn INC party a zawm a, Minister of State-ah ruat niin Transport, Labour & Employment leh Co-Operative Department te a enkawl a ni. He term chungh vek 1994-ah Cabinet Minister-ah hlankai leh a ni a, Mara te zinga Cabinet Minister hmasa ber a ni. 1998 General Electionah INC party

atangin thlantlin leh niin Opposition Group Leader (Congress Legislature Party)-ah ruat a ni.

Pu Zakhu Hlycho hi September ni 1, 2017 khan a lu na leh BP sang a zual deuh avangin MGC (Maraland Gospel Center) Hospital, Siaha-ah a inentir a, mahse that lam a pan loh avangin September ni 4, 2017 khan Aizawl rawn panpuiin LRM Hospital ICU-ah enkawl a ni a. A hnuah Civil Hospital ICU-ah insawn lehin September ni 6, 2017 tlai lam dar 1:30 khan a rawng a lo bawl thin a Lalpa hnenah chatuana chawl tawh turin min lo kalsan ta a ni. Kha kha a chanchin tlangpui, a tawi thei ang ber a ni e.

Pu Speaker, a dawt leha kan sun tur Pu F.Lalzuala, ex-MLA hi 14th July, 2017 zing lam dar 10:30 ah lung lam natna avangin Civil Hospital, Aizawl-ah a boral a ni.

Pu F.Lalzuala hi a chhungkhat laina leh thian thate chuan 'Patea' tiin an ko thin a, Tawipui lal, Pu Aichhuma Fanai (L) leh Pi Saiziki (L) te fa naupang ber a ni. 12th July, 1949-ah Tawipui khuaah a piang a, an unau hi sawmpali (14) an ni a, mipa 8 leh hmeichhia 6 an ni. Kum 1978, 29th April ah Pi V.Hmingliani d/o V.Thatchianga (L) nen an innei a, fapa 4 an nei.

Zirna lamah chuan Primary leh Middle chu Tawipui khuaah a zo va, High School chu Cherapunji-ah kalin College hi Shillong leh Aizawl-ah a kal thin. Electric Department-ah LDC hna 1975 – 1979 chhung a thawk a, P.K Middle School-ah 1980-1982 chhung a thawk bawk a ni. Hemi hnu hian contract hna leh sumdawwna lamte a chhonzawm ta a ni.

Pu F. Lalzuala hi a dam phawt chuan khawtlang rawngbawlina lamah pawh theih ang tawka inhmang thin mi a ni. Lusun chhungkua lenpui leh damlo kan te a Pathian rawngbawlina ah ngaiin theihtawp a chhuah a, a taksa a chak that tawh loh hnu ah pawh a phak tawkin rawngbawl chhonzawm zelin damdawi-ina damlo te, Lock up-a tang te, bazaara chawhmeh zuar ho te zingah tawngtai leh thuhri la rawngbawlina a dam phawt chuan a thlah lo. Kum 2005 Presbytery inkawmpui, Chanmari Lunglei-ah Presbyterian Kohhran Chanmari Upa atan nemngheh a ni. Hei hi Lunglei tihnaah ka ngai a.

Pu F.Lalzuala hi ram rawngbawlina lamah pawh theihtawp chhuah thin mi a ni a, MNF underground ah pawh 1966 khan a chhuak a. Kum 1993 October ni 27-ah MNF party a zawm a, hemi kum vek 1993 General Election-ah Tawipui Constituency atangin MLA ah thlan tlin niin, chumi hnu ah Indian National Congress party a zawm a, Government Deputy Chief Whip hmasa ber a ni nghe nghe a ni.

Pu F.Lalzuala hi 1994 atang khan zunthlum natnain a tlakbuak a, kum 2011 khan lung lam natna a nei tih hmuhchhuah a ni bawk a. Heng a natna vang hian Damdawi inah pawh tum engemaw zat a lut a, 14th June, 2017 khan heart attack a nei leh a, doctor te a inentir hnuin in lamah a inenkawl a. 14th July kha doctor hnenah a in check up leh hun a ni, mahse heta in check up tura a kal hi Congress Bhavan-ah a kal hmasa a, tichuan a chhuak tur chu nikhaw hre lova tluin a awm zui ta a ni. A rang thei ang bera Civil Hospital Casualty pan pui a ni a, doctor leh nurse ten theihtawp chhuah mahse 14th July, 2017 zinglam dar 10:30 khan rawng a bawlsak thin Lalpa hnenah min lo kalsan ta a ni.

Tunah hian Col. Lalchungnunga Sailo, nimin piaah lawka min boral san sunna leh a chanchin tawi kan sawi leh ang a. Col. Lalchungnunga Sailo, ex-Minister hi November 11th 2017 zinglam dar 12:15 ah New Life Hospital, Aizawl-ah kum 79 mi niin a boral a ni.

Col. Lalchungnunga hi Sertlangpui, Lunglei District khaw lal Zempawla Sailo (L) leh Saithuami Sailo (L) te fa pathumna a ni a, September 15th 1938-ah Sertlang khua ah a piang a, an unau hi mipa pali leh hmeichhia pathum an ni. Kum 1969 April 26th-ah Pi Lalrammawii d/o Rova, Zarkawt nen an innei a, hei hi mi hlui deuh chuan kan hriat dan tur chuan Pu H. Khuma fapa Pu Rova kha a ni.

Zirna lamah chuan class VII atang Matric thleng chu Govt. High School Shillong-ah a zo a, kum 1961 ah St Anthony's College, Shillong atangin B.A a pass a ni. Army Officer nih a chak thin avangin kum 1962-ah Union Public Service Commission exam ah a tling a, Indian Military Academy (IMA) Dehradun-ah training tura thlan a ni. Mizo zingah chuan Army Officer UPSC exam kaltlanga tling hmasa ber a ni. Kum 1963 June-ah training zovin Commission Officer a ni a. Hemi hnu hian First Assam Regiment a zawm a, sipai dan angin kum 2/3 danah India ram hmun hrang hrangah a insawn kual hnuin Nagaland-ah 8 Mountain Division-ah IN & FS Intelligence Company-ah post a ni. Hetah hian operation hrang hrang an beihna hi a khirhin hna a hautak hle a, huaisen tak leh remhre taka nunna engmah hloh lova a hote a hruai avangin President of India chuan huaisen lawmman (Bravery Award) Sena Medal a hlan a ni.

Kum 1980 January-ah Lt.Col.-ah a kaisang a, Zunheboto, Nagaland-ah 15th Assam Rifles Commandant in a awm a, heta a awm lai hian Naga hnam chi hnih Ao leh Sema te nasa takin an intibuai a, hemi tum pawh hian a huaisen vang leh hun harsa tak karah mipuite thlamuana a lo humhim

avangin Chief of Army Staff Commendation Card (Award) a dawng bawk a ni.

Col. Lalchungnunga Sailo hi a hna thawh chhungin a hming a tha hle a, kum 1983-ah Directorate of NCC North East India, Shillong-ah sawn a ni leh a. Hemi kum vek hian N.C.C Cadet Youth Exchange Programme-a N.C.C thalai India state hrang hrang atangin engemaw zat chu Canada-a hruai tura thlan a ni. He Indo – Canadian Youth programme hian ram pahnih thalai te zingah inhriat tawna leh in pawh tawna tha tak a siam a ni.

Col.Lalchungnunga Sailo hi a pension hnu hian Mizoramah rawn hawin MPC party a zawm a, 1998 General Election ah Aizawl West-I Constituency atangin MPC ticket in MLA-a thlan tlin a ni a, Cabinet Minister-ah dahin Social Welfare Department leh Labour & Employment Department te a enkawl a ni.

Kum 2002-ah Baptist kohhran upa atan thlan tlin a ni a, amah hi mi thinnel, zaidam leh rinawm tak a ni. A hmabak hlen chhuah tum tlat mi a ni. A theih ang anga tanpui ngaite tanpui thin mi a ni.

Kum 2009 atang khan a lung a thalo tih hriat a ni a, hemi kum July thlaah Apollo Hospital, New Delhi-ah by pass heart surgery tih sak a ni a, a hlawhtling hle a, mahse hun engemaw chen atangin khuh a nei tan a, New Delhi lamah a inentir leh a, chutah chuan a chuapah natna chikhat ILD an tih chu hmuh chhuah a ni leh a. He natna hian a thlah meuh ta lo a ni. October 7th ah New Life Hospital, Aizawl ah admit niin that lam aiin zual lam a pan hret hret a, doctor leh nurse hoten theihtawp chhuaha an enkawl mek laiin November 11th 2017, zinglam dar 12:15 ah a rawngbawl thin Lalpa hnenah min chawlsan ta a ni.

Pu VANLALZAWMA : Pu Speaker, ka lawm e. Vawiinah hian kan House Leader-in a sawi tak ang khan mi pathum helai hmuna kan hotu pawimawh tak tak lo ni tawh thin te a ruala sun an ngai dawn ta a, a lungchhiatthlak hle a. Chutihlaiin an chhungte pawh an hmel te kan hmu a, kan tuarpui takzet a ni tih kan sawi duh a.

Ka rilrua lo awm nghal pakhat chu kan House Leader sawi ang deuh khan vawiinah hian kan member pathum (3) a ruala kan sun te hi he House zahawm taka tuna political party hrang hrang pathumte (3) hian kan member pakhat (1), kan hotu pawimawh tak pakhat (1) theuh kan sun dawn a lo ni reng mai.

Congress atangin kan hotupa Pu F.Lalzuala a ni a. Tin, M.N.F. lam atangin Pu Zakhu a lo ni leh a; tin, M.P.C. lam atangin Col. Lalchungnunga a lo ni leh a. Engemaw zawng tak chuan thil vang tak te pawh a nih rualin he kan sunna ah hi chuan kan rilru a inhma tlang viau mai awm mang e aw, mipathum (3) kan sun dawn a ni a tih te ka ngaihtuahna ah a lo lang a.

Engpawhnise, he House-a an lo thawh tawh dante leh anmahni chanchin kan ngaithla tawh a, keiin chipchiar takin ka sawi lo vang a. An chanchin zia kana te chu ka'n lakhawm ve a, amaherawhchu kan House Leader sawi kha duhtawh ta ila.

Kan House Leader in a sawi tum dan zawk khan kan sawi ang a, chatuan ram pan dan indawt dan zawng khan. Pu Patea, Pu F.Lalzuala kha kan hriat ang khan kumin July thla khan min boralsan a ni a. Amah hi kei ka hre thui lutuk lova. Tunhma lam chanchinte, a MLA lai pawh chianguang em emin kan hre ve lo a. Amaherawhchu tunhnu hian hetia Aizawla a rawn pem pheih tak hnua a rawngbawl thinna hi hre ve nualin ka inhria a.

A zahawm ka tiin a ropui ka ti a. Lock up ah te, damdawiinah te kalin tawngtainate hmangin tuktin deuhthaw hian a fehchhuak em ni aw ka ti a, a chanchin han ngaihtlak leh a thawm han hriat in. Tin, khawlai dunga han inhmuh zauh zauh pawhin chutiang khatiang chuan ka kal a tih hi a ni fo mai a.

'A ropui mang e aw, kan tih hleihtheihloh leh a nachang pawh kan hriatloh tihian upat lamah i ti a, a va ropui em,' te ka ti ve thin a. Amah a zahawm hle a, khatiang rawngbawl naa tihtakzeta tha leh zung senga mangangte tan a hun a lo hmang a, tawngtainate a lo hmang thin kha a Pathian thuin a rawngbawl na a ropui ka ti a.

Nichina kan ngaihtlak tawh ang khan tunhma lamin khawtlangah te leh kohhranah te, a bik takin Lunglei lamah te a inhmang nasa em em tih kan hria a, kan ui takzet a. A chungte pawh kan tuarpui takzet a ni tih kha han sawi mai ila.

A dawt lehah chuan nichina kan ngaihtlak ang khan Pu Zakhu kha Mara ram tan chuan mi hmasa tak mai hi a lo ni a. Hmahruaitu pawimawh em em mai leh kawng engkim, infiamna lam a ni emaw, culture lam a ni emaw, literature lam a ni emaw, politics lam a ni emaw, kohhran lam a ni emaw, mi hmasa leh mi pawimawh em em mai kha a lo ni a.

Tun hnu kan han inhriat ve hnu hian ka notice danah chuan amah hi a bula awm hi a nuam em em mai a. Mi a ngaichang thiam a, chutihlai chuan mi chungtlak ni si lo hian mi hi a kaihruai thiam a, leadership quality a nei niin ka hmu a. A awm ve hi chuan a ngaihtuah dan te han hriat hi kan chak nghal thuai a. A thusawi te pawh hi beng a verh em em mai thin a ni. Politics-a a thil lo tih dan te, a ngaihtuah dan hrim hrim hi.

Chutiang ang miropui leh hruaitu hmasa vawiinah kan sun leh a han ngai ta hi a uiawm takzet a. A chhungte leh a rawngbawlpui te, a laina hnai zawng zawng kan tuarpui a ni tih kha tawitein han sawi leh ila.

Tin, Pu Chungnunga hi helaiah Aizawl lamah a pension hnuin kan hre ve chho a. Tin, a mimal tak pheii chuan amah ka chian em em na hmasa ber chu a hminga politics-a kan han tel ve, 1999 tawp lama M.P.-a thlan kan nih ve khan ani hi Delhi lama min chhukpui tura party hotuten an ruat a ni a.

Ama ho hian khulaiah Delhi ah, kal ngai em em lohnaah hma kan zu la ho a. Tih dan tur engmah kan hrelo a, ani hian min kaihruai a. Hneh takin, ani sipai hlui te a lo ni bawh a, chinchang a lo hria a, vai tawng nen a lo thiam a. Khatiang khan thlamuang em emin a thlazar hnuaiah hian kan chhukthla ho a.

Tunhnu pawhin kan inhre tha em em a. Thu han rawn mai tur leh engemaw a ngaihtuah dan an sawi reng reng hi a pawm tlak em em mai a. Tin, mi tak tak a niin ka hria a. Ka tihna chhan pawh tunhnu hian a bial hlui lamah (West III tih a ni tawh a) sawn kan han tel pheii ve a. Sawtah pawh sawn kan hotu tam tak hian a hunlaia an thil tih te leh ani kaihhruaina hnuaia sawlam a bial chhunga thil tih hi tun thleng hian an la refer reng mai a.

Pu Chungnunga ho khan chutiang khatiang chu a ni a, ani kha chutiang khatiang chuan a lo kal a tih hi sawi tur an la ngah em em a. An la ngai takzetin ka hria a. Hun rei tak a bial lo chung khan sawi hlawh ber te zing ami a ni a. Chuvang chuan pa ropui tak a ni tih kha chungte chuan a confirm lehzualin ka hria a.

Vawiinah a chhungte leh a laina hnaite leh a awmna party te kan tuarpui takzet a ni tih ka'n sawiduh a. Vawiina kan sun tur pathum (3) te hi he House tan an uiawm em em a. He House tan mai a ni lo a, he ram tan leh anmahni awmna party te tan mi tangkai tak vek kan sun dawn a ni a.

Pu Speaker, an chhungte pawh kan tuarpuiin an lusunna ah kan tawrhpuu takzet a ni tih ka'n sawi ve duh a ni. Ka lawm e.

SPEAKER: Sawi duh dang te pawh an awm nual ang a. Amaherawhchu hun kan ngah tawh lova. Pu Thanliana hi P.C. atanga kan MLA neihchhun a nia, a sawi phalsak hram ila a tha awm e. Amah i lo sawm ang.

Pu LALTHANLIANA: Pu Speaker, kan ram hruaitu chhuanawm tak tak te sunna hunah thusawina hun tha min pek ve avangin ka lawm e.

Kan ngaithla tawh a, a chanchin chipchiar takin ka sawi tawh dawn lo a. Amaherawhchu kan hotuten an sawi hnuhnun ber kha ka'n sawi hmasa ber ve thung ang e.

Kan hriat angin Col. Lalchungnunga Sailo hi sipaiah rinawm takin pension thlengin a tang a. Sipaia a tan chhungin chawimawina hlu tak tak te pawh a dawng a ni tih kan hria a. Chu mai bakah chuan sipai atangin a rawn bang a, politics leh kohhranah te pawh a hun tam zawk a hmang chho a.

Tichuan khawtlang leh ram tan nasa takin a inhmang a ni. A hun laiin a hawina lam apiangah lehkha zir a ni emaw, eizawna ah te; tin, politics-ah leh kohhran-ah pawh hotu leh hruaitu a ni pha zat zat zel a ni. Mi vantlang chunglam a ni chho zel a, a chhuanawm hle mai.

A mizia amah thlah nia an ziahlan bakah keimahin ka theihngihl theih tawh loh thil leh a miziaa entawntlak ka tih tlem azawng han tarlan ve ka duh a, Pu Speaker.

Amah hi mi thinnel leh zaidam, rinawm leh mahni chanvo hlenchhuah duh tlat mi a ni a. Tin, a theih ang chen chen ah mi tanpui ngaite tanpui nuam ti mi leh mi tumruh, hlauhna neilo a ni. Chumi bakah chuan keimahin a mizia nia ka hriatchian em em ka sawi duh chu mi chapo lo, uang lo leh induhna nei miahlo a ni.

Chu mai bakah a rilru hi a tha em em mai a. Tawngkam a thiamlo a, thil pehhel a thiamlo bawh a. Thil hi a nihna angin a sawi tawp zel mai a. Ka sawifiah thiam dan ber chuan kan hotupa hi chu fiamthu pawhin dawt hrilh chi a ni lo ve, a chhan chu tak tak emaw a ti mai ang ka ti thin a ni. Chutiang khawpa rilru thianglim chu a ni a.

Vanduaithlak tak maiin a taksa ah harsatna a lo thleng a, by-pass heart surgery te a rawn tawh chho a. Hun engemaw chen chu a che peihlo a. Amaherawhchu a lo that leh deuh khan party leh ram tan hun tam tak a hmang chho leh a. Ka ngaihsan em em na leh ka sawi ve fo thin chu, a natna avangin pawn chhuak hleithi lovin a awm tawh hnu ah, a thuthmunah

inchhungah a hnara oxygen vuah a ngai reng chung pawhin thu pawimawh tak tak relin a inah ama ho ngeiin kan thukhawm a, kan committee thin a. Chutah pawh chuan thahnem ngai ber berah a la tang thin a ni.

Ram leh hnam hi a lo van hmangaih em ve aw ka ti thin. Inthlan ah MLA candidate emaw, party atangin hamthatna dang emaw beisei tur engmah a neilo a ni tih a chian em em tawh hnu pawhin a inhawng em em a. Party leh ram tan a inpe a, phunnawi miah lovin a awm thin a. Hei hi a ngaihsanawm ka tihna leh fakawm ka tihna a ni a.

M.P.C. party tan pheii chuan kawng engkimah pa nih a tling hliah hliah a ni. Hetiang taka mihlu kan han chan ta mai hi uiawm ka ti takzet a. A natna tawh dante han ngaihtuah chuan a khawngaihthlakin a lawmpuiawm tawh zawk alawm kan ti a ni mai thei. Mahse M.P.C. party tan chuan a uiawm em em a ni.

Col. Lalchungnunga Sailo-in min kalsan ta mai hi ram leh hnam tan mai ni lovin, keini M.P.C. party tan bik pheii chuan channa nasa tak a ni a. A kalsan tak a nupui fanau, a tu te, a unaute, amah hmangaihtu zawng zawngte Pathianin thlamuanin awmpui zel se tih hi ka duh em em a. Chu chu ka tawngtaina pawh a ni.

Pu Zakhu Hlychho hi a chanchin atangin mi ropui tak a niin ka hria a. Mara hnam tan an lei arsi, an hnam hmasawwna tura sulsutu mi tangkai berte zing ami a niin ka hria a. Mizoram politics-ah hian mi hlun tak, tawn hriat ngah tak, ram leh hnam tana mi tangkai ber pawl ami ni pawhin ka hria a ni. Chumi piah lamah chuan an kohhran Evangelical Church of Maraland-ah a kul ataiyah a tang a, a tangkai em em a ni. Chumai ni loin kan ngaihthlak tawh ang khan literature lamah te a tui a, contribution a ngah em em a. Lehkhahu pawh tangkai tak tak, tha tak tak, ro tling a ziaak a ni. Hetiang taka ram leh hnam tan chauh ni lova, kohhran tan pawha mi tangkai leh hlu kan chan hi uiawm ka ti em em a. A kalsan tak a nupui, a fate, a tute leh amah hmangaihtute zawng zawng tan Pathian thlamuanna ka duhsak a ni.

Tin, Pu F. Lalzuala hi kum 1985 kum tawp lam khan kan inhmelhriat ve a. (Mission for Christ kan tuipui lai khan) Pathian thu duh tak mi a ni a, a sawi pawh a sawi thiam khawp mai. Vawi khat chu kan inah a lo kal a, amah a ni tih ka hriat tanna a ni a. Amaherawhchu politic-ah a lut tih ka hriat mai loh laiin MLA te a lo ni chho a. Tin, mi thil phal em em mai, midangte thatna tur hlira hun hmang ni berin ka hria a. A entawntlak hlein ka hria a. Tun hnuah pheii chuan party-ah a la awm zel a ni tih pawh ka lo hre chiah lova. Ka hmelhriat dan zawkah chuan miin taksa leh thlarauva damna an chan theihna tur atana hun tam tak hmangtu, rilru tam tak sengtu a ni a ni

a. Chu lama mi tan mi hlu tak a niin ka hria a. Hetiang taka mi hlu, thlarau mi, mi thahnemngai kan han chan hi a uiawm ka ti a. Political party-ah a awm nain a ngaihtuahna zawng zawng deuhthaw hi chung lam ami hian a control-in ka ring a ni. A kalsan tak a chhungte Pathian thlamuanna an neih theihna turin duhsakna ka hlan e. Pu Speaker, ka lawm e.

SPEAKER : Awle, midang sawi duh pawh kan awmin a rinawm a. Mahse, tih tur dang kan la ngah bawh si a, lo duhtawh mai ila. Tunah hian kan hruaitu kan ui em em Pu Zakhu Hlychho, Pu F. Lalzuala, Col. Lalchungnunga te hi kan uiin then kan phal lo em em a ni tih entir nan kan vaiIn minute khat kan ding dawn a. Hemi kan din chhung hian mahni rilru theuhah khawhar chhungte tan tawngtaina nen tunah hian i lo ding ang u.(Member-te minute 1 ngawi rengin an ding) Khaile, i thu ang u. Tuna kan sunna programme kha khawhar chhungte hriattir dan a awm a, chu chu kan officer-ten lo ti mai se.

Tunah chuan zawhna kan la tawh dawn a. Hemi hma hian vawiina kan thut khawm atang hian khawvel pumpuiah kan thla hi a lang vek tawh dawn a. Chuvang chuan thut duhdah lutuk te, mutthluk te pawh kha a lang mawi lo palh ang tih kha a hlauhawm a, mahni theuhah fimkhur tum ila a tha ang e.

Tunah chuan zawhna pakhatna kan la ang a, Pu Lalthanliana, MLA zahawm tak zawt turin i lo sawm ang.

Pu LALTHANLIANA : Pu Speaker, ka lawm e. Planning & Programme Implementation Department changtu Minister zahawm tak chhan atana ka zawhna chu:

- a) Aizawl Municipal huam chhunga MLA bial hrang hrang atan te hian NEDP sum dah a ni ve em?
- b) Engzat theuh nge dah a nih?
- c) Eng atante nge dah a nih?

Ka lawm e.

SPEAKER : Chhang turin Planning Minister zahawm tak Pu Sawta i lo sawm ang.

Pu LALSAWTA : Pu Speaker, member zahawm tak Pu Lalthanliana zawhna chhanna:

- a) NEDP hnuaiah hian scheme hrang hrang a awm a, MLA bial anga sem lovin department hrang hrangah sum dah thin a ni.

b) Aizawl khawpui Municipal huam chhunga MLA bial hrang hrang chhungah hian a tul dana sum dah a nih avangin NEDP sum a hranpaa MLA bial chan tur dah a ni lo.

c) Aizawl khawpui Municipal huam chhunga MLA bial hrang hrang atan hian NEDP sum a hranpaa dah a nih loh avangin enga tan nge tih hi sawi theih a ni lo.

SPEAKER : Zawhbelhna. A zawhna neituin zawt hmasa sela. A neih loh chuan Pu Ruatkima.

Pu LALRUATKIMA : Pu Speaker, ka zawhbelhna chu NLUP leh NEDP hi converge a ni em? Converge a nih chuan eng scheme-ah te nge converge a nih? Chutah chuan sum engzah nge dah a nih a, tute nge nodal department ni ta tih ka zawt e.

SPEAKER : Zawhbelhna dang, Pu Pianmawia.

Pu R.L. PIANMAWIA : Ka zawhbelhna chu hei hi a ni e. NEDP sum atang hian NLUP chhonzawm tumna a awm em? Awm ta se MLA bial khatah chhungkua engzat nge pek theih a nih ang tih a ni e.

SPEAKER : Zawhbelhna dang a awm loh chuan Planning Minister zahawm tak chhang turin i sawm leh ang.

Pu LALSAWTA, MINISTER : Pu Speaker, member zahawm tak Pu Ruatkima zawhbelhna “NLUP leh NEDP hi convergence a ni em? Eng laiah hian nge convergence a nihna lai” tih zawhna kha ‘Convergence’ tih tawngkam hian kan ti vak lova, keinih chuan NLUP hi kan chhonzawm a, a la kal reng a. Chutichuan NLUP-a hlawhtling te, mahni puala lo hlawhtling te, khang ang chi ho kha thlai lampang emaw, buh leh bal lampang emaw, ran vulh emaw, thil siam lam a ni emaw. Khang lampanga an lo hlawhtlin khan, thil hlawhtlinpui te a lo tam tawh khan ‘market linkage’, a zawrh chhuah lamah te a tih dan tur NEDP hian buaipui turin kan ruahman a, NLUP atang hian thar chhuahte pawh a lo tam ta a. Chu angte pawh chu a lo tam tawh kha chuan khawilai kawng sirah zawrh lam piah lamah te pawh market tak tak anga company te pawh au luta a tul anga sorkar lam pawhin a tih theihna tur atan hian NEDP hi kan inralring chho a. Tin, nikum 2016-2017 financial year atanga tan chauh a nih avang khan chutiang tak chuan kan tum ang hi chu kan la thleng pha lova. Amaherawhchu NEDP hnua i atang pawh hian NLUP tur atan dah a ni a, chuvangin a ‘convergence’ tih anga sap tawnga han sawi kha a dik em em tho a, mahse, an thawk ho tlang a ni tih ang te pawhin a sawi theih ang a.

Pu LALRUATKIMA : Pu Speaker, khawngaihin, helaiah hian APR pakhat, NLUP line department pakhat chuan, NEDP/NLUP convergence scheme hnuaiah cheng nuai khat tanpuina dawng tura thlan i ni e tiin APR an ziah tir a ni. Kan Minister zahawm tak khan convergence scheme angin kalpui a ni lo a ti bawk si a, kalpui a nih thu hi tah hian a chiang bawk si a.

Pu LALSAWTA, MINISTER : Pu Speaker, kalpui a ni lo e, ka ti lo a, a saptawng hi kan hmang chiah lo e ka ti mai a ni. (SPEAKER : A lo chiang mai ang) A saptawng hi kan hmang chiah lo a, kan thawk ho e, NLUP leh NEDP hi kan thawk ho e, ka ti a. A sap tawng chuan, 'convergence' te pawh chu a ni ang chu. Mizo tawngah chuan kan thawk ho a, a rual te pawhin kan thawk ho a, chu chu a awm dan chu a ni, Pu Speaker.

Chutichuan, NLUP hi kan sorkar ve chhung chuan tawp turin kan programme lo a, a kal zel ang a; a chhan chu a mamawh tam tak an la awm ve zel avang leh a hlawhtling tawh sa te NEDP atanga han chhawmdawl chhoh theih zel te a lo nih bawk avangin thawhhona hi chu kan siam a. Chuvangin, a sap tawngah kha chuan 'convergence' pawh a tih theih a, mahse a tlangpui thuin 'convergence' kan han tih hi chuan, kan hre theuh a, department dang atanga department dangin a rawn puihna thin ang te hi, School Education ah te pawh Water supply-ah te, an mamawh chuan electric te, khatiang khan convergence kha a ni a. Mahse chutiang tak hi chu kan la hmang tam lo a, kha kha kan lo hmang tihna te pawh a ni ang a, member zahawm takin a rawn sawi chhuah ang khan, chu chu tuna kan dinhmun chu a ni a.

Tin, member zahawm tak Pu R.L. Pianmawia zawhna-NLUP hi engtinng e kan chhunzawm leh dawn? MLA te engzat theuh nge pek an nih ang, tih kha a ni a. Hei hi Pu Speaker, NLUP hi ka sawi tawh ang khan kan chhunzawm reng a, chutiang a nih avang chuan nikum 2016-17 ah khan a chhut awlsam zawngin beneficiary ang zawngin MLA bial khat ang zelah hian 36 ang te pawh hian han ti chhin ila mawle, kan ti a. Tun kumah pawh hian chutiang zawng chuan a aia tam hret kan buatsaih mek a. Kuminah hian 38 ni tawh lo in 48 ang te chu kan thei mai ang a kan ti a. Engpawhnise, department nena thawh ho tur a la ni a, chuvangin 'convergence' han tih a department pakhatin emaw han huikhawm ang tur zawnga nodal department ang zawng khan kan kal hranpa lo reng reng a. Amaherawhchu, tunah hi chuan Planning department hian department dang dang atanga action plan te an rawn theihluh angin a buaipui ber tu chu Planning Department hi kan ni. Kha kha ka han chhan theih chin a ni e.

SPEAKER : Zawhna pahnihaah kan kal thei ta a. Pu Lalruatkima zawhna neitu i lo sawm ang.

Pu LALRUATKIMA : Pu Speaker, ka lawm e. Ka Starred Question No. 2, Cooperation Department changtu Minister zahawm tak chhan atan:

- a) MIZOFED-in FCS & CA Department-ah buhfai engtik atangin nge a supply? Engzatnge a supply tawh a, kg khat engzat rate-in nge supply a nih?
- b) Buhfai supply nan hian sum engzatnge sen a nih tawh a, khawia sum nge hman a nih?
- c) Buhfai supply tur hi tute hnen atangin nge lei a nih a, engzat rate-in nge lei a nih?
- d) MIZOFED-in buhfai supplier tute hnen ah nge ba a la neih a, engzat nge ala bat tih ka zawt e.

SPEAKER : Cooperation Minister zahawm tak chhang turin i lo sawm ang. Pi Awmpuii.

Pi VANLALAWMPUII CHAWNGTHU, MINISTER: Pu Speaker, ka lawm e. MLA zahawm tak Pu Lalruatkima zawhna chhanna chu:

- a) MIZOFED-in Mizoram sorkarah 8th August, 2016 atangin a supply tan
 - a. Supply tawh zat chu
 - i) 5,53,000 quintals @ ₹25 per kg.
 - ii) 40,000 quintals @ ₹27.50 per kg.
 - b) Buhfai lei nana sum sen tawh zat chu ₹14,80,64,000.00 a ni a, MIZOFED sum bak chu buhfai lakna te hnen atanga a ba a lak a ni thin.
 - a. Supply bill draw veleh pek nghal a ni thin.
 - c) Buhfai te hi mi hrang hrang hnen atangin lei a ni a.
 - i) 5,53,000 quintals @ ₹2480/- per qtl.
 - ii) 40,000 quintals @ ₹2730/- per qtl.
 - d) Tun dinhmunah chuan tu hnenah mah bat kan nei lo. Ka lawm e.

SPEAKER : Zawhbelhna, a neitu Pu Ruatkima.

Pu LALRUATKIMA : Pu Speaker, ka lawm e. Tunlai chu kawng chhe baw, buhfai chhe baw an ti a. Pu Speaker, nimin ah supply go-down ka va kal a, buhfai chhia a lo tam mai a. Engtia tih nge an tum dawn ni? Supply Minister a awm lo a, zawhna neitu Minister zahawm tak chan lam a nilo hlah a. Cooperation changtu Minister kan zawt zui lo mai ang a. Engtinng MIZOFED hnuaia buhfai supply tu mi pali te kha in thlan tih kha ka zawhbelhna ni sela.

Tin, ka zawhna dang leh ah chuan MIZOFED hian direct-in buhfai hi 3rd party ruai kher lo in (helai mi pali an rawih te ruai kher lo hian) a

supply ve thei lo em ni? A theih loh chuan eng nge a chhan tih kha ka zawhbelhna ni sela.

Tin, a tawp berah chuan buhfai chhia supply a tam em em mai a. Pu Speaker, i bialah ngei pawh buhfai chhia tun hnai lawkah Tuipang godown ami tur thawn phei a ni a. A chhia leh a tha te an pawlh a, mihring eitlak mang loh godown pakhatat sawn a awm teuh mai a ni. Tin, West Phaileng-ah buhfai chhia an thawn tur pawh MNF thalai ten thawn phal lo in, 'hetiang chu mihring ei tlak a ni lo ve, thawn tawh suh u', an ti a, an hlan thlak luih tir a. Chutiang te chu kan dinhmun a ni a, hei hi a supplier lam te fimkhur tawh loh vang te pawh a ni thei a. Chuvangchuan, hei hi kan Minister zahawm tak hian he House kaltlang hian buhfai tha zawk supply tur hian min assure thei em tih kha kan gennga a ni tel e.

SPEAKER : Dr. K. Beichhua.

Dr. K. BEICHHUA : Pu Speaker, i phalnain order-ah hian supplier Rem Rem Enterprise atang hian quintal khatah Pu Speaker, (Pu TT Zothansanga : Pu Speaker : Chhangtu tur Minister an awm loh hian kan zawh belh zel dawn em ni?) Cooperation a awm alawm, hei hi Cooperation ami a ni. Cooperation challan, order leh bill a ni. Tichuan, quintal khatah ₹2480 a ni a. Chutihlai chuan helaia supply order Cooperation-in a siam ni 12.8.2016 ah hian Mr Agrifesh Trading Company hnenah quintal khat ₹ 2450 in a ti leh si a, a inang lo a ni, hei hi a chhan min hrilh thei em tih kha ka zawh belh a ni e.

SPEAKER : Pu K.Lalrinthanga.

Pu K. LALRINTHANGA : Pu Speaker, Supply godown-a buhfai, Zuangtui ami kha MNF ho khan an va tibuai vak mai a, khami an va tihbuaia an dah that kha mipui hnena an sem tur nge buhfai chhia an dah hran? Chumi chu beisei theih a ni em? Chung zingah chuan Mizoram Legislative member te hi an tel ve em tih ka zawt duh bawh a ni.

SPEAKER : Helamah zawt phawt rawh se, i dinglamah hian

Col. Z.S. ZUALA : Pu Speaker, private-a Cooperative Society through-a an lak hi engzat rate-in nge an lak tih leh FCI a lak nge economical zawk a Cooperative Society through-a lak tih kha ka zawt belh a ni mai.

SPEAKER : Pu Rinawma'n zawt law law se,

Er. LALRINAWMA : Pu Speaker, ka lawm e. Buhfai hi engtinng e an supply tih kha ka zawt duh a. A chhan chu ka'n sawi belh duh chu buhfai a tha lo khawp mai a, kan nau ten an va en a. A hmain kan va en tawh a, a that loh zia kan hmu a. Chumi hnuah engemaw report deuh te a awm avangin kan han en leh a, chumi tum pheii chuan a chhia tam tak kha mi pali vel va kalin West Phaileng-ah hlan turin an lo ti a, an lo tiang ur tawh mai a. Engpawhnise, kan hlang thla leh ang e an lo ti a, an hlang thla leh a. Engpawhnise, tunah a tlangkawmnaah chuan buhfai chhiat thu hi chu dawt a ni lova, Retailer te pawhin an hmu thliah thliah a, hei hi eng grade nge supply tura kan tih? Kan Minister zahawm tak hian ama chan hnuai atanga supply te a ni bawk a, chak leh zualin quality control chungchangah hian Supplier te pawh a lo thunun thei em tih kha ka'n zawt a ni e.

SPEAKER : Danin a phal piaah lam hi zawh belhna hi a tam tawh a. Pu Sangthuama kha, a nih leh aw Pu Vena.

Pu R. VANLALVENA : Pu Speaker, ka lawm e. Zawhna kha Supply Minister chhan awm tak tak nen khan a inkalh ta nuaih a. Godown chungchang te kha chu Supply chan a ni tawh a, chuvang chuan amah Minister a awm si lova, Question dangah khan a kal theih mai lawm ni? A chhangtu a awm si lova.

SPEAKER : Kha kha a thiam ang ang, a hriat ang ang khan a chhang ve phawt ang a. A piaah lam kha chu helam thu a ni tawh mai ang a. Minister zahawm tak Co-operative chhangtu i lo sawm ang.

PI VANLALAWMPUII CHAWNGTHU, MINISTER : Pu Speaker, zawh belh min chak em em bak ah, ka vawikhat chhanna a ni bawk a. Buhfai chhia chungchang kha chu nia, opposition party-a kan awm laiin Congress thalaiin buhfai chhia kan va hai hrep mai a, buhfai chhia chungchangah hi chuan tihpalh, a chhia lo awm palh hi a awm thei a, khalai kha chu duhtawk ta ila, ka chhan ve theih chin mi pali supply tute thlan dan chungchang, tender chhang hniam hniam ni turah ka ngai a. Vawiiina ka chhan theih chin chu mi pali te ruai kher lovin tih dan a awm em tih Pu Ruatkima zawhbelhna kha, supplier 4 te ruai belh kher lova tihdan kawng a awm thei a nih chuan kan lo zawng ang e tih hi ka chhan theih ni sela. Kan lo en ang.

Tin, supply rate chungchang chu Supply department chan a nih avangin ka chiang tlat lo mai a. Tin, a grade chungchangah pawh khan Supply Minister zahawm tak a awm lo chungin grade tha zawk kan lo ngaihtuah ang tih ka sawi duh bawk a.

Tin, MIZOFED-a supplier pali te hming kan duhin ka hria a, mi 4 te hi Pi C.Lalrampari, Aizawl Venglai; Pi Hmingdailovi, Mission Vengthlang, Pu Lalrindika, Zarkawt; Pi Lalzampuii, Electric Veng te an ni a. Buhfai hi a tha thei ang ber supply kan duh a, amaherawhchu, khua te a chhiat avangin kawng a tha tawh lova, ruahsur leh kawngchhia avanga harsatna tawh hi kan hlau viau. Amaherawhchu, a phurhna leh dah hulna kan neih that tawh loh avang tea harsatna dang tawh lo turin theihtawp kan chhuah ang tih hi ka chhan theih tawh a ni e. Ka lawm e.

Dr. K. BEICHHUA : Pu Speaker, ka zawhna kha min chhang tlat lo mai a, supply order hi – “Office of the Mizoram State Co-operative Marketing & Consumer” tih a ni a, chutah chuan Managing Director, MIZOFED tih hming signed a awm a ni. Tichuan helai Bill ka rawn sawi kha – “To, The Managing Director, MIZOFED Aizawl” tih a ni leh bawh a ni. A rate inanglo kha enge a chhan tih kha ka zawhbelhna a ni a. Khalai kha min chhang thei ang em aw?

SPEAKER : Minister zahawm tak i chhang thei ang em?

Pi VANLALAWMPUII CHAWNGTHU, MINISTER : Pu Speaker, khalai kha kan lo inenfiah ang a, nakinah ziakin chhan theih kan lo tum dawn nia.

SPEAKER : Zawhna pathumnaah kan kal tawh ang a, zawt turin Pu T.Sangkunga i lo sawm ang.

Pu T. SANGKUNGA : Pu Speaker, ka lawm e. Ka Starred Question No. 3-na hi kan Minister zahawm tak Public Works Department changtu chhan atan ka'n zawt ang e.

(a) A hnuaia PMGSY road te hi engtikah nge pavement work zawh theih beisei an nih?

(i) Leithum (Thinghrangkawn) – Bungzung.

(ii) Leithum (Thinghrangkawn) – Vangchhia.

(iii) Khuangleng – Leisenzo.

(b) Original estimate amount leh revised estimate amount inthlauhna engzatnge ?

SPEAKER : Minister zahawm tak Pu Lal Thanzara chhang turin sawm ila.

Pu LAL THANZARA, MINISTER : Pu Speaker, ka lawm e, Tuipui bialtu zahawm tak Pu T.Sangkunga zawhna Starred Question 3-na chhanna chu.

- (i) Leithum (Thinghrangkawn) – Bungzung kawng hi kum 2018-a zawh tum a ni.
- (ii) Leithum (Thinghrangkawn) – Vangchhia kawng hi November, 2019-a zawh tum a ni.
- (iii) Khuangleng – Leisenzo kawng hi May, 2019-a zawh tum a ni.

(b) Original estimate amount leh revised estimated amount inthlahna engzatnge tih chhanna chu:

Heng kawng 3 (pathum) atan hian Revised Estimate siam a ni lo, amaherawhchu Leithum (Khuangleng) to Bungzung road hna thawh zawh nan hian sanctioned amount in a daih loh avangin state pawisa ₹ 90.00 lakh ruahman belh a ni.

Leithum (Thinghrangkawn) to Bungzung leh Leithum (Thinghrangkawn) to Vangchhia kawngte hi Champhai to Khawbung road-a Thinghrangkawn atang ve ve a intanin Bungzung leh Vangchhia te an pawh a, Khuangleng atang chiahin a intan lo ve ve a, mahse, Khuangleng hi helaia khawlian leh lar ber a nih avang leh Thinghrangkawn hi khuaa chhiar tham anih chiah loh avangin heng kawng pahnih te hi a bul tanna khuaah Thinghrangkawn hmang lovin Khuangleng hman a ni ve ve ta a ni.

SPEAKER : Tunah hian thupuan tur tlem kan nei a, tun session chhunga Panel of Chairman turte:

- 1) Pu Nihar Kanti Chakma MLA,
- 2) Pu T Sangkunga MLA,
- 3) Pu Lalruatkima MLA
- 4) Er. Lalrinawma MLA te an ni.

Tun session chhung hian Panel of Chairman min nih sak dawn a ni.

Tin, tun session-ah hian member absent an awm nual a, Minister pahnih Pu John Rotluangliana leh Pu PC Lalthanliana, Pu Zodintluanga... I'm sorry... Pu Zodintluanga a authorised tak e. Pu Lalrinawma Dy. Speaker a awm lo bawk a, Pu John Siamkunga pawh hi a awm lo bawk a, a tih tur pawimawh ang ang kha Pu T. Sangkunga hnenah thuneihna authority pek a ni. Tunah chuan Laying of papers kan la ang a, Chief Minister zahawm tak Pu Lal Thanhawla'n paper lay tur a neih ang ang chu lay turin i sawm ang.

Pu LAL THANHAWLA, CHIEF MINISTER : Pu Speaker, he gathering zahawm takah hian 'The Mizoram Parliamentary Secretaries

(Appointment, Salaries, Allowances and Miscellaneous Provisions) (Repeal) Ordinance, 2017' ka rawn lay e.

SPEAKER : A copy kha sem ni se. Awle, tunah chuan Pu Lalsawta Minister zahawm takin paper lay tur a neih ang te lay turin i sawm ang.

Pu LALSAWTA, MINISTER : Pu Speaker, Mizoram Governor recommendation ang leh i phalna leh House remtihna in heng a hnuaia thil pawimawh tak tak subject pathum ami Report hi he House zahawm takah hian ka rawn lay dawn e.

1) Report of the Director of Local Fund Audit on the Account of Local Bodies (Village Council within Lunglei and Mamit District) for the accounting year ending 31st March, 2013.

2) Report of the Director of Local Fund Audit on the Account of Local bodies (Village Council within Lunglei and Mamit District) for the accounting year ending 31st March, 2014.

3) Report of the Director of Local Fund Audit on the Accounts of Local Authority (Village Council CADC, Serchhip District, Champhai District, Mamit District, Aizawl District, Lunglei District, Executive Secretary, CADC (including Village Councils), Secretary-cum-Development Officer, SHDC, Executive Secretary, LADC) for the accounting year ending 31st march, 2016.

Heng pawimawh tak tak te hi House zahawm takah hian rawn lay ka dil e.

SPEAKER : A copy sem ni se. Khai le, tunah chuan Motion for Election to Committee on Local Fund Accounts move turin Minister zahawm tak Pu R. Romawia sawm ila.

Pu R. ROMAWIA, MINISTER : Pu Speaker, Motion for Election to Committee on Local Fund Accounts hetiang hian ka rawn move e.

"That the Members of this House do proceed to elect Interim Record by Sub-Rule 1 of Rule 2002 read with Rule 250 of the Rules of Procedure and Conduct of Business in Mizoram Legislative Assembly to serve as a member of Committee on Local Fund Accounts, Mizoram Legislative Assembly for a period of 30 months". Thank You.

SPEAKER : Hei kan danah Committee-a member turte hi a thlan a thlan a lak theih a ni a, nomination paper pawh Secretary office atangin a lak theih a, vawiin tlai dar 3 thleng hian Secretary hnenah nomination paper thehluh theih a ni bawh a ni. Tin, in withdraw duhte tan naktuk zing dar 9 thleng hun hawn a ni bawh a ni. Kha kha Financial Committee hi chu a thlana thlan a nih avangin tuna kan dan anga kan kal kha a ngai a ni.

Tunah chuan Motion for Election to Committee on Public Undertakings move turin Pu Lalrinliana Sailo (a thutna an lo thlak a kha, a ni lo lamah kan en daih chu)

Pu LALRINLIANA SAILO : With your permission, Sir, 'That the Members of this House do proceed to elect in the manner required by Sub-Rule 3 of Rule 202 read with Rules 254 of the Rules of Procedure & Conduct of Business Rule in Mizoram Legislative Assembly to serve as members of Committee on Public Undertakings, Mizoram Legislative Assembly for the unexpired portion of the term' Thank you.

SPEAKER : Hei pawh hi kan danah Committee-a member tur te hi a thlana thlan tur an ni a, nomination paper pawh Secretary office atangin a lak theih a, vawiin tlai dar 3 thlang hian Secretary hnenah nomination paper thehluh theih a ni bawh. Tin, in withdraw duhte tan chuan naktuk zing dar 9 thlang in withdraw theih a ni.

Tunah chuan Presentation of Report-ah kan kal ang a. Bussiness Advisory Committee chu dt 31. 10 Thawhlelni-in a thukhawm a. Tun tum 14th Session of 7th Assembly detail pgogramme a ruahman a. Bulletin Part 2-na No. 192, tahrik 1.11.2017 khan kan rawn inhriattir tawh kha. Committee Report hi House-ah ka rawn present a, a copy kha han sem ula, a tha ang e. Bussiness Advisory Committee Report copy.

Kha kha tun tum session-a kan kal dan tur tlangpui a ni a, House- in a pawm ve a ngai a. Kan pawm mai lawm ni? A lawmawm e.

Tunah chuan Legislative Business-ah kan kal ang a. Kan Chief Minister zahawm tak Pu Lal Thanhawla'n 'The Mizoram Parliamentary Secretaries (Appointment, Salaries, Allowances and Miscellaneous Provisions) Repeal Bill, 2017' hi House-ah introduce rawn dil se, amah i sawm ang.

Pu LAL THANHAWLA, CHIEF MINISTER : Mr. Speaker Sir, with your permission, I beg leave of the House to introduce 'The Mizoram Parliamentary Secretaries (Appointment, Salaries, Allowances and Miscellaneous Provisions) Repeal Bill, 2017'.

SPEAKER : Kan phalsak mai lawm ni? Phalsak a, tunah chuan introduce rawh le, rawn move nghal mai se.

Pu LAL THANHAWLA, CHIEF MINISTER : Mr Speaker Sir, with the permission of the House and with your permission, I introduce the said Bill and also with your permission, I beg to move the Bill.

Kan hriat dan chuan state hrang hrangah Parliamentary Secretaries an awm thin a, keini state-ah pawh Bill leh Act (Dan) ang thlapa siam kan nei a; amaherawhchu, state hrang hrangah hman dik lohna te leh Assam bik ah khan Supreme Court-in a paih sak tih kan hria a. Khati a nih kha chuan keini state-ah pawh thil thleng ve thei tho a ni a, khatia a tawpkhawk nghak kher lovin keini Parliamentary Secretaries te chu mahni duh thalin sorkar tan leh pawl tan thahnem an ngaihna avangin an bang ta thliah thliah a. Chuti a lo nih bawk si avang leh Supreme Court-in a lo repeal tawh bawk si chuan keini pawh hian neih zui rih a tul tawh lo a hriatna avangin he Bill hi kan lo introduce a.

Tin, he House hian min ngaihtuah saka, lungrual taka min pass sak tur pawhin kan ngen nghal bawk a ni. Pu Speaker.

SPEAKER : Thil awm tawh kha awm tawh lo rih mai rawh se tih kha a ni a. Court reading avangin sawiho lutuk kan duh em ni? Sawiho hram engti zawngin?

Pu LALRUATKIMA : E... sawi min phalsak thei em aw, Pu Speaker?

SPEAKER : A sawi duh chuan sawi theih e, mahse tawi te in aw.

Pu LALRUATKIMA : Pu Speaker, tawi tein House Leader zahawm tak khan a rawn pharh a, he Bill luh hma hian (repeal bill luh hma khan) "The Mizoram Parliamentary Secretary Appointment and Salary Allowances and Miscellaneous Provision Bill 2009" kha he House zahawm takah hian March ni 18.2009-ah introduce a ni a. Tichuan 24 March 2009 vek khan passed zui a ni a. Kan Parliamentary Secretary zahawm tak tak ten Oath of Secrecy te, allegiance te an ti vek a, chulaiah chuan khami an discuss-na proceedings han en pawh khan a hun lo mang e aw kan ti a. Mahse politics thilah hi chuan thil tul tak tak te pawh a awm a ni thei a niang e. Khatiang a nih tak siah chuan Court berin a rawn tih takah chuan unconstitution repeal a lo ngai a. Kan sawi tel duh chu Pu Speaker, helaiah hian statement of objects and reasons-ah hian a tlar hnuai ber dawttuah khan for laying a rawn ti ringawt a, objections-ah khan for introduction, consider and pass a rawn dil tho nanging statement of objects and reasons ah khan consider a

pass kha rawn dil tel ta zawk se a appropriate zawk awm mang e aw tih ka ngaihtuah a.

Chutih lai chuan kan sorkar hi (a ni lo lamah min ngaihsak lo ula) kan efficiency a tha tawh lo tih a lang a. A chhan chu niminah khan post pawimawh tak, MPSC Chairman appointment order a rawn chhuak a, chutah chuan copy to ah khan P.S. to Parliamentary Secretary tih kha a rawn awm vauh mai a ni. Hei hi kan kalphung zel tur a nih chuan kan inenlet a ngai khawpin ka hria a. A copy kha MLA te min pe lo nain social media kaltlangin kan lo hmu ve a, kan Minister-te hi chuan in kawh vekin ka ring a, P.S. to Parliamentary Secretaries kha pek tur an awm tawh lohna a rei tawh si a, khatiang ringawt mai kha chu helai nen a inkaihnawih tho avanga ka hriat avangin kan House Leader zahawm takin min lo hriatpui sela a thain ka hria a. Tun hnuah chuan hetiang thil an ban hnu leh an post an luah tawh lohna pawh a rei tawh a, chuvangin khatiang efficiency lo lutuk kha chu tun hnuah chuan awm tawh lo se ka duh thu kha hemi repeal bill rawn sawiho pah zawk khan ka rawn tarlang ve a ni e. Pu Speaker, ka lawm e.

Pu LAL THANHAWLA, CHIEF MINISTER : Pu Speaker, a lawmawm khawp mai.

Ni e, kan typist te ti mai ang, (ka thiam ve danin) hi chinchang hre lo ve tak tak an ni tih a lang mai a, khata tang khan. Tin, a officer ten an lo endik leh vek kher tawh lem lo a. Mizoram sorkar hnuaia thawk ve ta fam chuan Parliamentary Secretary-te an bang vek tawh tih te kha chu hriat ve awm tak a ni. Common sense a nih loh pawhin common nonsense pawhin hriat awm tak a ni a, a pawh khawp mai. Tin, kha mai kha a ni lo a, S a awm tawh phawt hi chuan saptawng an type-ah hian apostrophe a awm deuh zel mai, hengte pawh hi ka sawi fo tawh a, S a awm tawh hrim hrim hi chuan apostrophe awm tur emaw ti mai te hi an tam khawp a, member zahawm tak rawn sawi kha kan belh chhah ve duh hrim hrim a ni.

SPEAKER : Awle, kha kha sawiho a tul tehchiam lova, kan pawm tlan a ni a, kan Chief Minister zahawm takin pass rawn dil tawh sela a tha ang e.

Pu LAL THANHAWLA, CHIEF MINISTER : Pu Speaker, kan hriat theuh angin sawi duah pawh a ngai lova, a chanchin engkim kan hre vek a. Tin, helaiah kan Parliamentary Secretary ber te pawh an thahnem ngaihna avangin sorkarah embarrassment siam an duh loh avangin lungawi takin, lungual takin an bang dial tawh a. Tichuan,

awm tawh lo na na na dan kha neih reng a tul tawh loh avangin member zahawm tak ten lungual taka min pass pui turin, min pawmpui turin kan ngen a ni. Ka lawm e, ka pu.

SPEAKER : Kan Chief Minister zahawm takin ‘The Mizoram Parliamentaries Secretaries Appointment Salaries Allowances and Miscellaneous Provisions repeal Bill, 2017’ hi House-in pass pui a rawn dil a. Pass remti zawng ‘remti’ ti ru le. (Members : Remti) Remti lo kan awm em? Kan awm lo. Tichuan, he repeal Bill hi lungual takin kan pass ta e.

Pu LAL THANHAWLA, CHIEF MINISTER : Pu Speaker, member zahawm tak leh i hnenah lawmthu ka sawi e.

SPEAKER : Tunah chuan Pu R. Romawia, Minister zahawm tak kan sawm ang a “The Mizoram (Pension for Members of Defunct Mizoram District Council and of the Defunct Pawi - Lakher Regional Council) (Amendment) Bill, 2017” he House-ah introduce rawn dil se, i sawm ang.

Pu R. ROMAWIA, MINISTER : Pu Speaker, “The Mizoram (Pension for Members of Defunct Mizoram District Council and of the Defunct Pawi - Lakher Regional Council) (Amendment) Bill, 2017” he House zahawm takah hian introduce phalna ka rawn dil e.

SPEAKER : Kan phal em? (Aw...phal e). Phal mai a, introduce se, sawiho turin rawn move nghal sela.

Pu R. ROMAWIA, MINISTER : Pu Speaker, kan hriat theuh angin ram dinhmun a lo in singsa zel a, Mizoram Union Territory te kan han ni chho a, chutah state puitling kan han ni a, kan District Council te, kan Regional Council te kha an kal zel kha a tul ta lova. Amaherawhchu khanga kan ram hruaitu pawimawh tak tak te kha mipui tana hna an lo thawh nasat tawh em avang khan khatianga han chawl mai ta an lo nih pawh khan pension siam ngei kha Mizoram mipuite duh dan a ni a. Chutiang a nih avang chuan Mizo District Council ah te Pawi Lakher Regional Council -ah te hetia member lo ni tawh te tan khan pension siam sak a ni ta a. Chu chu hun a lo kal zel a, vawiin dinhmunte kan han thlen takah hi chuan an pension-te kha a lo beitham ta hle mai a, he House zahawm tak bawh hian an pension te tihpun hi a hun tawhin kan hria em tiin sorkar lam chuan hetiang hian tihpun dan tur kha kan han ruahman a. Tin, anmahni te pawhin sorkarah dilna te an rawn siam a, a tlangpui thuin tuna kan hman mekah hi chu a beitham deuh a,

₹ 15,000/- (singkhat leh sangnga) kha a ni a, ₹ 20,000/- (singhnih) ah min tih chhoh sak ve ula, an rawn ti a. Tin, family pension kha ₹ 6,000/- (sangruk) a ni a, kha kha ₹ 10,000/- (singkhat) talah min rawn tih chhoh sak ve teh u tiin kan hruaitu hlui zahawm tak tak khan an rawn ngen a, chu chu ngun taka han ngaihtuah pawhin tunlai hun zelah awm tihna a lo awm chho ta a. An rawn dilna ah khan upper limit kha an rawn siam lo na a, mahse tuna kan han ruahman naah chuan a thankin deuh kha a pension thankin/upper limit (a sang zawng a an han tawng tur) deuh pawh kha kan han siam a.

Family pension a hmaa ₹ 6,000/- kha ₹ 10,000/- ah han chho sela, a than kinah khan ₹ 20,000 ni ta se te kan han ti a. Chutiang bawkin kan member hluite kha ₹ 15,000/- a tan a, kumtina 5% interest-a pung kha kan dan hmasa kha chuan a than kinah khan ₹ 22,000/- tih a ni a, mahse ₹ 35,000/- ni ve tawh se kan ti a. Tin, hemi kan ngaihtuahnaah hian tuna kan District Council pathum Mara Autonomous District Council te, Lai Autonomous District Council te leh Chakma Autonomous District Council a kan Ex-MDC hote kha hetiang ang level vekah hian an chho tawh a. Mizoram puma la ni lai leh khanga kan MDC te kha a hun lo rei tawh deuh mahse tuna ni mekte ang pha loa an awm kha chu dik theiin kan hre lova. Chutiang chuan he amendment hi a lo tul ta a. Chu chu tuna kan rawn putlul chhan ber hi a ni a. Chu chu ka rawn move dan deuh ber chu a ni mai a, pass kha chu nakinah ka la dil turah ka ngai a. Member-ten an han sawiho ang a, zawh duhte pawh an nei mai thei a, mahse an zawh hma hian sawi tlang nghal law law mai ila Pu Speaker, a tha ang a.

Tunah hian District Council-ah hian member la mek hi 5 (panga) kan nei a. Tin, MRC (Regional Council) lamah hian la mek hi 8 (pariat) kan nei a. Tin, a la dam chu 5 ni lovin 6 an ni a, Mizo District Council-ah hian. Pu C.L.Ruala hi M.P ding mek a ni a, M.P lamah hlawh a neih avangin a pension hi pek a ni lova. Tin, Regional Council lamah hian Pu Speaker, kan Speaker zahawm tak Pu Hiphei hi sawti lama pension la tur a ni a. Amaherawhchu, tunah Mizoram-ah hruaitu a la nih mek avang hian ani hi la lo a ni a. Chutiang chuan anni tello hian MDC la mek hi 5 an ni a, MRC la mek hi 8 an ni ta a.

Family pension erawh kha chu an la thahnem ve deuh hlek a, 38 in an la a. Tin, hetah hian an nupui thihsante hi 23 an ni a, Danin a phal anga an fanute pasal neilo emaw, lo kir leh te khang ang kha an fanute khan lak phal a ni sorkar danah, chu chu 15 an ni a, an zavaiin 38 an ni a.

Tichuan, hetah hian MDC term hmasa 1952-1957 ami te kha 52 atanga 57 kha dam an awm tawh lo nen an family pension la hi 6 an la awm

a, a tam ber erawh hi chu MDC term 1970-1972 U.T-in a rawn tih tawp kha a ni a. Tin, MDC lamah pawh hian chutiang deuh bawh chu a ni a. Mahse kan hriat theuh ang khan an term hi a inang lova, Mizo District Council-ah kha chuan 1952-1959 kha term hmasa ber a ni a, Regional Council-ah kha chuan 1953-1958 term hmasa ber (first term) a ni thung a ni. Khatiangte pawh kha kan member-ten kan hriat zau nan ka sawi duh a.

Sum lamah hian chutitakin a punna tur pawh a tam lovin kan hria a, tunah hian pension leh family pension-a kan hman hi ₹ 5,45,679/- a ni a, hei hi kan tihpun ang rate hi lo ni ta se ₹ 6,80,000/- ah a lo chho dawn a ni, chu chu hemi dinhmun hi a ni a. Chuvangin, he House hian hotu kal hmasate, kan ram hruiatu pawimawh tak takte kan zah chho zel a ni tih entirna te pawh ni pah fawmin he kan Bill hi tih awm tak, member thenkhat phei chuan in tlai tawh mah mah a ni tih mai awm takte pawh a ni hialin ka hria a. Chu chu ka han sawi zau a ni e.

S P E A K E R : Sawiho teh chiam tur a awm lova, engemaw clarification khami figure danglamnate hriat chian loh kan neih clarification siam duhte kan awm em? Sawi duh hrim hrim – Pu T.Sangkunga'n sawi hmasa rawh se.

Pu T.SANGKUNGA : Pu Speaker, ka lawm hle mai. Kan sorkarin kawng pavement rule a tihthat ziate zawh paha han sawi kha ka'n tum a nia, mahse ka rawn fak hmam hun a tawp ta si a. Tunah pawh District Council awm tawh lo (defunct) a member leh an chhungte tan kan sorkar thil tih a that zia hi han sawi phu in ka hria. En mai chuan, 'a awm alawm, a sen belh tur a tlem a, nuaikhat leh singli lekin a tih theih a' kan ti mai thei. Mahse hei hi thil namai lo tak a ni a, India rama hetiang equal rank, equal pay nei hi sipaite chauh an la ni. Assam hun laia Peon hlawh leh tuna Peon hlawh hi a inang lo nasa em em a, an pension pawh a inang lo nasa em em a. U.T tih khan Primary zirtirtute kha ₹ 80 emaw lek an basic pay a ni a. Tunah chuan cheng sang tel a ni tawh a. Chuvangin, pension inang han tih hi India ramah sipaiten an fight pawh khan an bei rei nasa a nia. Kan Parliamentary Minister-in kan ti tlai tawh mah mah a han tih pawh kha a awm viau lai in lawmawm tak a ni. Keini a pass pui theitu tur kan ni pawh hi a lawmawm a, Beneficiary te tana a lawmawm zia hi tlemte han tarlan ve tulin ka hria a.

Kan Chief Secretary hman ami, Pu Lalfakzuala pension leh kan Chief Secretary Pu Lalmalsawma pension hi chu a inthlau viau tawh ang. Pay an-revise te hian equal rank, equal pay tih hi sipai chauhin an nei a. Hei pawh hi tuna N.D.A sorkar hian inthlan hmam an tiam a, an ti leh lawk thei lova, rei tak buaina an siam hnuah sipai te khian an sut chhuah a ni a. Keini chu a thawm pawh kan hriat lohvin kan Minister zahawm tak leh kan sorkarin

hetiang Bill putluh nachang a rawn hria hi lawmawm ka ti a. Tin, kan District Council memberte hi an kumte enin an lo bawrhsawm tial tial a, tunlai ami te aia pension tlem zawk han enjoy te hi an khawngaih thlak a. Mi tam pawh an ni tawh lo tih mai ni lovin hetiang kan sorkarin ngilnei taka anmahni leh family pension tihpun a rawn rawt diat diat hi a lawmawm a. MLA leh M.P ah te pawh hetiang hi la awm zel thei a ni. Chungah chuan hrisello zawk leh tar zawkte chungchang rawn ngaihtuah a, sorkar lo awm leh zelte pawhin hetiang pension chungchang an rawn ngaihtuah te; salary an ngaihtuah te pawhin heng hi an rawn hriat zel a tul. Tin, India ram hmun tam taka ex-service personnel ten a fight-a an fight chhuah thil har tak ang kha vawiinah hian kan Minister zahawm takin defunct District Council member leh an chhungte tan a rawn pulut leh chumi ngaihtuah thei leh pass pui thei tura kan lo awm ve te pawh hi a lawmawm ka ti a. Chuvangin he Bill hi pass ngei turin ka rawn support a ni e. Ka lawm e.

Dr. K. BEICHHUA : Pu Speaker, kan Minister zahawm takin he bill a rawn putluh hi tha ka ti a, ropui ka ti a ni. Ka pawmpui thlap a, chutih lai chuan Statement of Objects and Reasons tih kha kan chhiar thla a, pakhatna, pahnihna, pathumna kha kan chhiar a 'The only surviving members of erstwhile Mizo District Council and of Pawi – Lakher Regional Council are all very old persons and are dying out very fast' a ti a ni. Pu Speaker, nang i la tlangval ang reng si a, thih hma tir kan tum lutuk chein ka hria a. As such, this pension scheme itself will also cease to exist within a short time a ti leh zel a ni. Hei hi ziah tel kher ni lo mai se, thih hma tir kan tum lutuk chein ka hria, chuvang chuan helai hi chu awm ta lo se understood ah dah ta ila tih ka rawt a ni.

SPEAKER : Dr. Ngurdingliana.

Dr. NGURDINGLIANA : Tuna member zahawm tak Pu K. Beichhua sawi kha kei pawh rawn deal ka tum a. Kan Parliamentary Affairs Minister khan duhsak takin an zahawmna te, an protocol maintain dan tur te a rawn sawi chipchiar viau a, a lawmawm lutuk a a. Amaherawhchu tah hian an tlem zia thu leh thih hun chu tuman kan hrelo a, mahse thi vat tur angin kan ziak niin a lang a. Hei hi chu malsawmna chitin renga kan vur hnuah he thil hi hun reilo te chhung tur a ni tih ang deuh khan zawlnei ang deuhah kan inchachhuah ringawt mai a. Chuvangin, he number 3 hi chu khawngaihtakin omit ni thei sela a lawmawm ngawt ang.

SPEAKER : Ka tel ve a ni tih an hriat hmam an lo ziak palh a ni mai thei. Kan Minister zahawm takin chu chu lo chhang se, kha kha a paih theih mai em an ti a nih chu.

Pu R. ROMAWIA, MINISTER : Hei hi kan nauten an rawn tih pawhin, 'hei chu anchhe in lawhna lam te pawh a ang thei mah mah lo maw' ka ti a. Amaherawhchu, 'ka pu, factual-a (a taka) kan tawng hi a ni tlat mai a, a taka kan tawng mek hi chu ziaak ngam loh tur a awm hleinem,' an ti ve tlat mai a. Chuvang chuan 'dying out very fast' tih kha a taka kan tawng a nih ve tlat avang khan an rawn dah tel a ni mai a, kan member te tan pawh han ngaih huat tur a awm em em lo lawm ni ka ti deuh a, a nih tak chu kan han ti ta kha ni a. Kan zuih sawt viau reng a ni. Chuvangchuan, hemi sum tun ami pawh hi a ei tur chu an tlem tawlh tawlh dawn; tun hnai mai ah pawh Pu R. Lalhuzauva te, Pu C. Chhunbura te, hman deuh lawk ah Pu C. Sapnela te ti khan an kiam zel zawk chu a ni.

'Dying very fast' amaherawhchu 'very' em em hi chu 'dying fast' tih mai awm tak chu a ni a. 'Dying out very' kher hi chu a ni lo deuh mai thei a ni, dying out fast hi chu ti ta mai ila chuan (**SPEAKER**: Tichuan thlak chu rawt mai la) 'dying fast' tih mai 'very' kher kher kha chu a ti lutuk deuh kan member ten in tih pawhin a awm khawp a. Mahse, a tak tak chuan kha kha kan tawng mek chu a ni. (interruption) 'Kan member te hi an kum a upa tawh a' tih chinah hian kan duh tawk mai dawn em maw ni le! 'And' atang hian paih mai ila, chu chuan thil tam tak kha a imply tho alawm le. (**PU K. SANGTHUAMA** : Kha kha a ngai em mi? Kan thih hma dawn leh dawn loh te chu tuman kan hrelo a. Pu Hipheia aia boral hma tur pawh an tam mai thei asin tah pawh hian. Chuvangin khati laia zu dah kher kha Pu Speaker, tha ka tilo a, enge va dah kher a tulna? Mihring thih hun tuman kan in hrelo, vawiina upa deuh pawh hi kum za a dam chuan heta mi hian an thihsan teuh thei tho a, chuvangin a nihna tur chuan beiseina chu upat chuan a bo na a, mahse kha laia dah kher kha kei Pu Speaker, a tul kherlo ka ti.) Hemi kalhmang chu Statement of Objects and Reasons a ni a. Pawisa a ei dawn ta a, pawisa ei tur chi reng reng kha chu Financial Bill anga Governor-a a kal tlang a ngai ta a. Cheng khat pawh expenditure a lo awm dawna a pun dawn chuan financial bill anga Governor pawh a kal tlang a ngai ta a. Chuvangin, heti laia kan dinhmun dik tak awm kha va hrih hriat ngaihna lai a awm a. He kan dan tak takah hian a lang dawn lo reng reng a, hei chu Statement of Objects and Reasons a nia, engatinge he an pension hi tihpun a lo ngaih tak tih atanga hengte vang hian a lo ngai ta alawm mawle tihna mai kha a ni a. Nakinah dan an kal ang a, hemi Statement of Objects and Reasons hi chu he House tan te, tin, Governor pawhin a lo rem tih ve mai, nan te, expenditure incur tam lo tur a nihna te leh khang atana rawn ziaak mai kha a ni a. Hemi Act a provision ah hian, Pension Rule-ah hian a bet dawn lo hrim hrim a ni.

Pu LALRINLIANA SAILO : Pu Speaker, a din lai hian kan pui ang e. A ziaktute hi an rilru a tha hle niin a lang a, hetianga pension la ho hi an upa tawhin an tlem tawh si a, an thi chak ropui mai si a, i duat teh ang u an tihna a

ni. Paih kherlo pawh hian an uizia leh an ral chak zia a rawn sawina mai a ni a. Chuvangin thil na lutuk a lang loin ka hria keichuan. Chuvangin paih kherlo pawh hian a tha tho alawm le, a mawi khawp alawm le.

Pu LALRUATKIMA : Pu Speaker, Statement of Objects and Reasons-ah hian mimal hming te a rawn tar lang a. Pu Speaker, hming rawn tarlan tan kha chuan ngaihthlak a nawm pawh ka ring chiah lo a, a hming rawn tarlan en vang vang hian kan zingah pawh a awm tho a, keini ai chuan a inchei dan pawh a la tunlai a ni. A dam te pawh a dam reilo ang tih te pawh kan sawi thei chuang lo a, khang kara khami chhuanlam hman kha kan Minister zahawm tak kha a inthlahrung lutuk deuh em aw ka ti a. A chhan chu a awm kan tih thu kha heng point hrang hrang pali hian a sawifiah khat viau tho chuan ka hria, kha laiah khan 'dying out very fast' han tih ngawt mai te pawh kha ni e, an chawhnu lam ve tawh a tih tawngkam thu khuh tak nen kha chuan a inanglo deuhin ka hria. Chuvangin kan Minister zahawm tak khan engtin emaw siam rem dan a awm mai lawm ni? Kan siamthat tur lai nilo mahse kan chhuanlam turah khan bet ta lo mai sela, a tuartu te pawh a hlawh la mek te pawh ti mai ang, hemi enjoy tute tan pawh khan a dawnawn pawh a nuam deuh ang a, khati ngawt kha chuan i thi tep tawh ania ti a damlo va kan kha a chi lo deuh ang a tih te pawh ka ngaituah mai mai a. I dam chhuak thuai dawn e, kan lo tawngtai pui zel ang che ti a kan han in tawng thlamuan te pawh hi ngaihthlak a nuam ve a nia kan ti a ni.

Pu R. ROMAWIA, MINISTER : Objects and Reasons maia awm a ni a, heti laiah hian a lang dawnlo reng reng a, anchhia anga kan lo ngai a ni emaw, blessings anga kan ngai pawh ni se, kan danah kha chuan a lang dawn lo reng reng a, chu chu tun House a pharh nan te a tul a. Tin, Governor hnena phalna lak nan te a tul a, tin, actual-a kan thil tawn a ni bawk a, fact a ni a, chu mi fact han tih lan te pawh chu a tul a, chu ti lai zawk chu a ni a, dan ah hian a lang dawn lo hrim hrim a ni. Tih sak vat vat a tulzia tihlanna pawh a ni tel a ni. Tin, sum te pawh kan mamawhnaah khan heti laia kan defunct MDC pakhat leh defunct MRC member pakhat Pu Hipheia leh Pu C.L. Ruala te pawh kha an number kan tlarah khan hemi te hian tunah chuan an la lo a, tih te pawh kha a ngai ve tlat a ni. Tuna member ten min hriatthiampui ka duh chu, hemi kan dan chhinchiah hi chu, kha zawng kha a ni mai a. Objects and Reasons hi chu a lang dawn lo reng reng a. Amaherawhchu, Pu Speaker, kan din takah chuan, member ten an lo point out ka rin em em mai an rawn point out lo hlauh mai a.

Section 2 Amendment-a provided-ah khan provided that in no case increment previously earned tih ah khan earned tih mai turah p an lo chhu tel a, kha kha chu patent error anga siam that mai theih a ni a. Heti lai te in rawn point out lo zawk a, a dang ka rin loh daih zawk Objects and Reasons

lam zawk kha in rawn tuipui ta daih zawk a. Objects and Reasons hi chu danah hian a lang dawn lo hrim hrim a. Tin, hemi dan hi kan lo tih chuan a effective date pawh kha ngun takin in chhiar ang a. Date of publication in The Mizoram Gazette atanga effective date tur kha a ni bawh a ni. Chu te chu kan han clarify duh a ni e. Pass ka dil mai thei em ni, ka pu?

SPEAKER : In sawi duh chu a lang tawh mai a.

Pu K. SANGTHUAMA : Pu Speaker, tawi te in, khawngaihin, kei chu ka rilruah zawk chuan heng lo upa deuh pawh hi ni ta sela, a mihring zat chuti chu an awm a, chuvang chuan sum pawh a tam lo a, tih kha tawh mai se chuan tha ka ti a. An upat vanga khatiang an lo thih hnaih tawh vanga pension pek an ang a. An phu ve reng a Pu Speaker, an hmuh ve kha kan rilruah hian awm zawk sela. Heta official an rawn tih ah pawh hian an chhu dik, an ngaihtuahna a dik vakin ka hre lo a.

Min an tar tawh a, an tlem vanga hmu mai ni lovin, MDC an lo nih ve tawh avanga an phu na khan, tunlaiah pawisa hlutna a tlem tawh avangin lo pung ve sela tih lama rilru dah lova, an tlem tawh bawh a, pawisa tih tham an hlawh tawh lovang. Tin, an lo tar tawh a, tih ang lam a nih kha chuan a lawmawmna kha a tlem riau mai a. Chuvangin, hei hi chu lang lo se chuan, kan rorelna ki ah chuan Pu Speaker, kan ti fuh zawk lawng maw tih kha kan sawi leh hram duh a ni.

Pu R.ROMAWIA, MINISTER : Pu Speaker, ka ding zing hle a. Ka sawi tawh ang khan Statement of Objects and Reasons hi chu engah mah document dangah khan rawn lan zawmna tur a nei tawh lovin ka hria a. Mahse chuti chungah kan member ten an ngaih pawimawh chuan heng zawng zawng pawh hi pawt thla vek mai ila. A bill body kha kan pass theih chuan a lawmawm tho tho a ni mai a. Hei chu a sawi chhuahna velah khan ngai ta ila. Engpawh ni se, nakin zela ziaka kai tur awm chi Statement of Objects and Reasons hi ziaka kai leh document-a kai tur awm chi te a lo nih chuan, a pathumna hi chu kan nuai bo ang a. Palina hi pathumna ah kan sawn chho mai ang. Chutiang chuan member te in lungawi em?

Pu Speaker, ka Bill 'The Mizoram Pension for Members of the Defunct Mizo District Council and of the Defunct Pawi Lakher Regional Council (Amendment) Bill, 2017' hi he House zahawm tak hian min pass pui turin ka rawn ngen e.

SPEAKER : Khami Objects and Reasons paih tih kha, paih tawh hnu ah i tihna nge, pathumna.

Pu R.ROMAWIA, MINISTER : Kha kha a ngai lo. A danah khan engmah a rawn lan zawmna tur a awm dawn tawh lo. Hei hi, pass tel chi a ni ngai lo. Sawihona ah a tel mai mai.

SPEAKER : Pass tur a ni lo a maw! Ngawi rawh, pass tur a ni lo na in, member te ngaih pawimawh chu MDC, MRC thlan tlin an nih ve avanga pension hmu tur kha, tar thi hma tur an nih avanga pension hmu tur anga objection awm kha, kha kha an ngaimawh a ni. Kha kha a dik tho. I officer te khan khalam kha an ngaihtuah pha lo a ni ang.

Pu R. ROMAWIA, MINISTER : Chu chauh a ni hleinem, Pu Speaker, an ziaak dan i la chhiar Chiang lo zawk a nih kha. 'This Pension Scheme itself will also cease to exist within a short time' te kan ti nghe nghe asin! Rapthlak deuh asin, chuti zawnga rapthlak zawnga ngaih chuan. Mahse, hei hi thudik chu a ni tho si a ni.

Chuvangin, a scheme pumpui pawh hi mamawh loh hun a la awm dawn, a la tawih ral vek dawn, te kan ti nghe nghe asin! Engpawhnise chu chu kan lo note ang a. Pu Speaker, document-ah te lang tur leh eng emaw zel a nih kha chuan hei hi chu kan nuai bo vek ang. 'Short time ah cease to exist' te pawh hi, 'within a short time' han tih te pawh hi a lo la 'exist' reng maithei asin. Kum 200 te in dam hlawm phei chuan.

Tin, chu chauh a ni lova, member ten kan hriat tur tul chu upa deuh lam pawh hian nupui an sun hian a la tuai deuh te pawh an nei zel mai si a. Chutiang deuh chuan, family pension lam hi chu rin ai chuan a kiam mawh deuh. Tin, an fanu pasal nei, lo kir leh te ang te pawh kha sorkar danah khan family pension an enjoy theih si avangin, khati laiah kha chuan a kiam mawh deuh. Family pension tuna enjoy mi 38 te hi chu a kiam mawh deuh mai thei. Amaherawhchu, hemi a member dik tak 15 erawh hi chu rin ai chuan a kiam rang viau a ni.

Mahse dan hi kan pulut zeuh zeuh a, Objects and Reasons kan khel tak vak chu ka la hre lova. Tun hi ka hriat vawi khatna a nia. Engpawhnise, House ngaihdan chu Pu Speaker, i thu thu le.

SPEAKER : A Bill kha chu pass rawn dil mai la. Objects and Reasons kha chu a siam that theih mai a. A paih theih mai ka ti a nih chu. I duh loh chin kha chu, tuna i ngaimawh chin kha chu paih mai la. Pass tur zingah khan a tel chuang lova.

Pu R. ROMAWIA, MINISTER : Pu Speaker, a tel chuang lova. Chuvangin, ka rawn dil tawhin ka hria a. Ti laiah hian, The Mizoram Pension

for Members of the Defunct Mizo District Council and of the Defunct Pawi-Lakher Regional Council (Amendment) Act, 2017 hi he House zahawm tak hian min pass pui turin ka rawn ngen a. Tin, section 2-naa earned spelling-a 'p' lo belh tel pawh hi patent error-a min pawm sak turin ka rawn ngen bawke.

S P E A K E R : Kan Minister zahawm tak Pu R.Romawia'n 'The Mizoram (Pension for Members of Defunct Mizo District Council and of the Defunct Pawi – Lakher Regional Council) (Amendment) Bill, 2017' hi pass a rawn dil a, pass remti zawngin 'remti' ti ru le, (MEMBERS : Remti) Remti lo kan awm em ? Awm loh chuan he Bill - 'The Mizoram (Pension for Members of Defunct Mizo District Council and of the Defunct Pawi – Lakher Regional Council) (Amendment) Bill, 2017' hi he House hian lungtual takin a pass ta e.

Tunah chuan Bill pakhat kan la nei a, Pi Vanlalawmpuii Chawngthu kan sawm ang a. "The Mizoram Co-Operative Societies (Amendment) Bill, 2017" hi he House-ah introduce rawn dil se.

PI VANLALAWMPUII CHAWNGTHU, MINISTER : Pu Speaker, ka lawm e. I remtihna leh he House phalna in ka Bill "The Mizoram Cooperative Societies (Amendment) Bill, 2017" hi he House zahawm takah hian introduce ka rawn dil e.

S P E A K E R : Kan phal em? Aw, a lawmawm e, kan phal a, introduce la sawiho atan rawn move nghal mai rawh.

PI VANLALAWMPUII CHAWNGTHU, MINISTER : Pu Speaker, ka lawm e. "The Mizoram Cooperative Societies (Amendment) Bill, 2017" hi he House zahawm takah hian ka rawn introduce a. He bill ka rawn move hma hian ngaihdam dil ka duh a. Helaia a number kan rawn pek, sub-number 1,2,3 tih turah 1,1,2 tiin kan rawn tisual palh a. Kha kha patent error-a min ngaihsak turin he House zahawm tak hi ka rawn dil a. Tin, a dawt lehah chuan no.4-ah khan Pu Speaker, i phalna in kan chhiar lawk ang a – In the meanwhile, the Constitution (Ninety-seventh Amendment) Act, 2011 has come into force w.e.f. 15th February, 2012 which stipulates that the term of office of elected members of the Board and its Office Bearers shall be 5 (five) years (photo copy enclosed herewith for kind reference). Mahse photo copy kha kan lo enclose hmaih hlauh mai a. He House zahawm takah hian ngaihdam ka dil pahin he photo copy hi sem min phalsak chuan ka lawm hle ang.

SPEAKER : I nei tho em? A nih chuan tih hmian sem sak mai ang, House-in a ngaidam tawh vek a nih chu. Han sem zo vek se.

Pu LAL THANHAWLA, CHIEF MINISTER : Pu Speaker, Pi Vanlalawmpuii Chawngthu hi he House-ah hian nula hnah khat member hmasa ber a ni a. I duat pawh hi a phu khawpin ka hria.

SPEAKER : Mi zawng zawng ngaihda a sawi a ni mai. Khai le, rawn move tak tak tawh mai rawh le.

Pi VANLALAWMPUII CHAWNGTHU, MINISTER : Pu Speaker, ka lawm e. He bill kan rawn move nachhan chu "The Mizoram Cooperative Act, 2006" chhung ami sub-section (57) of section 2 in a sawi 'Words and expressions not defined in this Act but defined in the Rules shall bear the meaning as defined in the Rules' tih hi han chhiar thuak hian dan pui zawk hi dan hnuai zawka awm ang hian a lang a. Rules hi Act ai hian a chungnung zawk ang hian a lang tlat mai a. He Rules hi Act in thuneihna a pek hmanga siam chauh zawk a ni a, chuvangin hei hi kan rawn putluh chhan pakhat a ni a.

Tin, sub-section (57) of section 2 hi thai bo pawh nimahsela section 133 hian he Act kalpuina tura harsatna awm apiang chu a tul ang zela provision siam theihna sorkar hnenah a pe diam tawh a.

Tin, 2nd para of explanation under first and second proviso of sub-section (3) of section 53 hi Cooperative Societies te inenkawlina leh thanlen chhoh zelnaah hnawksak zawk nia ngaihna a awm a. Chuvang chuan Act atang hian paih (delete)/omit ni sela tiin kum 2016-ah khan State level Cooperative Society General Assembly chuan a lo pass tawh a. A chhan chu Cooperative Societies elected Board members te term hi tunhma chuan kum 2 chhung a ni thin a. Amaherawhchu the Constitution of India, 1997 Amendment Act, 2011 khan kum 5 chhung atan a rawn ti danglam ta a ni. Chumi zulzui chuan Mizoram Cooperative Societies chuan Act pawh hi a amend veleh ta a.

Tichuan, January ni 13 atang khan he Act hi hman tan a lo ni ta a. The Constitution of India, 97th Amendment Act, 2011-ah hian kum 5 bak hi vawi engzat nge election-ah an contest theih dawn tih lam sawilan a awm lo bawk a ni. Mahse, Mizoram Cooperative Societies Act chuan miin kum 10, term 2 aia rei hruaitu a zawnin a chelh thei lovang, a ti si a. Chubakah kum 10 hruaitu a nihna la chelh tling lo pawh ni se kum 5 chhung atana thlantlin a lo nih leh kha chuan a belhkhawmin kum 10 aia a rei dawn chuan inthlan kha a chuh ve thei lovang tiin a sawi bawk a ni.

Tichuan, hemi awmzia chu Mizoram Cooperative Societies Act amend a nih hmaa term khat chelh tawh te, amend a nih hnu kum 5 term chelh mek hruaitu eng emaw zat kum 2 leh tuna term thar nena a inzawm hian hruaitu nihna a zawnin an lo chelh mek si avangin term thar atan inthlan an chuh ve thei dawn ta lo a ni. Chuvangin, amendment siam vat a nih loh chuan nakum June 2018 inthlanpui lo awm leh turah (inthlan tih hian MLA General Election ni lovin Society inthlan a ni) hian an hruaitu tha leh fel tak tak te chuan an contest thei tawh lovang tih a ni a. Kum 5 cooling off period hmang a an chawlh phawt a ngaih dawn avangin. Heng harsatna zawng zawngte hi chingfel tur leh Cooperative Society tana tha zawk tura ngaih a nih avangin he amendment bill hi siam tul hlein kan hria a, he House zahawm takah hian karawn move a ni e, ka lawm e.

SPEAKER : Sawi duh kan awm chuan reilote sawihona hun hawng ila. A awmzia chu in neitunu aiin mi nu a lal zawk ta si a, tihna ang a ni. Kha kha tihdanglam a ngaihna chiah chu a ni mai. In awm loh chuan pass rawn dil mai se. A tlai tawh em mai i rawn phar hun kha, sawi rawh le.

Er. LALRINAWMA : Pu Speaker, ka lawm e. Han sawi loh tawp kha chu a uihawm in ka hria a, he dan, amendment hi pawimawh tak a ni a. Tin, ka ngaihtuahnaa lo lut chu helaia nichina kan Minister zahawm takin a sawi ang khan Constitution 97th Amendment, 2011 hian tuna kan duhdan hi a kalh em aw tih te pawh hi central Act lampang a nia ngaihtuah tham tak chu a ni ve thoin ka ring a, Central Act hian kum 5 chin term sei zawng tan a bithliah a. Tuna amendment-in a tum ber ni a lang hi chu miin rei tak tak post an lo chelh tawh a, khami chelh leh zela kha a rawn thlawp a ni ber mai a. Amaherawhchu dan pangngaia kalpui khan mi tha tak tak helaia a tawpa a rawn ziah ang hian, society lama experience tak tak ten an chhonzawm thei dawn lo a, society in a tuar ang e, tih lai kha a ni a. Chutihlai erawh chuan tunah hian society erawh hi chu kan thang chho viau chuan ka hria a, amaherawhchu thil pakhat rilrua lo lang ve erawh chu, he amendment hi a tha ber em, thalo em tih hi ngaihtuah tham tak a tling a. A lehlam zawnga ngaihtuah chuan vawiinah hian hei hi lo pass ta ang ila, mithar zawk, thalai leh chak zawk tana rawn luhna chance kha chu kan hnawh ping dawn tihna ang a ni, society/ board-ah hian a nihna takah chuan. Tichuan mi hlui zawk leh rei tak tak hruaitu nihna lo chelh tawh te khan an lo chelh char char tawh mai dawn ang kha a lo ni ta a ni. A nghawng kha a lian hle dawn a ni tih kha Pu Speaker, ka'n sawi duh a. A chhan chu he central Act pawh hian a rawn tum chu thalai leh ngaihtuahna zau zawkte, khatiang te tana hun a rawn hawn ve na ni awm tak a ni, a tum laimu a hi. Tin, he Central Act hian provision neuh neuhah te pawh hian Finance lam mi thiamte luhna remchang pawh a rawn pe nghe nghe a, state sorkar in Dan a siam turin, mahse a vaiin

kan lo chhiar lem lo a, a pek leh pek loh kha chu kan zu hre lem lo a, khalam kha chu. A pawimawh lai ber chu vawiina he Dan kan pass (Amendment) hian a nghawng tur lai a chu thalaite tan kawng a tiping dawn a, michak tha lo chhuak tur te kawng a dang dawn a ni tih chu thil chiang tak a ni. Chulaiah erawh chuan mihlui zawkte leh mihlui ti mai ila, experience nei zawkte tan hun an nei rei thei ang a; tin, tun hun ngeia society hrang hranga nihna chelh mek te, tun inthlan lo awm leh tura chuh theilo tan pawh kawng a hawng leh dawn tihna chu a ni a, a nghawng tur chu a lian ve viau dawn a ni tih lai kha ka'n swi duh a. Engpawhnise tunlai khawvelah a lehlamah chuan mihring an lo thang chho zel a, mi talented tak tak te an lo piang a, khang khan ngaihtuahna thar nen, thinlung thar nen hma te kha an rawn la a ni. Chuvangchuan kan rilru leh ngaituahna seng ila a tha khawpin ka hria a, a Bill kha ka thlawp lo tawp e, ka tihna lam chu a nilo a, ngaihtuahna ti zau hrim hrimah khalai kha kan sawi duh a ni.

Tin, amendment na hmasa zawk, section 2, sub-section 57 ami ti hian a in ziaa a, Pu Speaker, i phalna in "Act but defined in the rules shall bear the meaning as defined in the rules" Dan reng rengah hian a zawng a za hi chuan kan va siam kim theilo tih chu a lang reng mai a, Dan ruhkaw! ngau ngauah hi chuan. Amaherawhchu khatianga kan va tihkimloh kha rules-ah a lo awm a nih chuan pawm a ni ang ti deuh mai hian ka hria a, a tawpa section 133-na a rawn sawi hian notification chhuaha chutiang khatianga an han ti kual a, a har chu a har phah dawn viau a ni tih te pawh kha a hriat a. A pangngaiah chuan helaia Danpuia kan lo ziaa tel loh a hman duh dan kan han siam tawh hnu ami kha pawm mai tur a ni tihna awm ang te pawhin a chhiar theih a, chutih laiin tuna dan thar kan hman turah hi chuan kan pass a nih chuan sorkarin khami hrilhfiah tur khan ngaihtuahna zau zawk a sen a ngai leh ang a, hun chu a tikhawtlai dawn hle a ni tih te pawh kha rilruah a awm a. Chuvangin vawiina kan thil pass tur hi thalaite hmakhua nghawng a ni, naupang zawkte hmakhua nghawng a ni a. Chutihrualin, a thatna ve ve chu a awm ang, amaherawhchu ngaihtuahna hman zau deuh hi a va tha em ve aw tih kha kan sawi ve hrim hrim duh a.

Tin, a dawt leha ka'n sawi duh chu society hrim hrim kan kalpui dan hi kan la ti fuh tawk lo em aw ka ti a. Thingtlangah phei chuan Co-Operative Society tha tak tak dawr tha, entirnan kan bialah te pawh Tlungvel ah te khian society tha deuh mai a awm a, an khuaah hian a tangkai khawp a, entirnan khitiang te. Tin, hmun dang dangah society tha tak tak te hi an awm a ni. Khatianga khan mipui tan tangkai takin hna an lo thawk tawh a, amaherawhchu anmahniin hna an thawhna sorkarin kan va hman tangkai dan lai erawh hi chu sorkar tinte pawh hian kan inenlet deuh chu a tha awm mang e aw ka ti a. Kan hmang tangkai thiam tawklo niin ka hria a, khawvel ram changkang zawk te pawh hi han thlir chuan society kalphung tha atanga rawn

in ti chhuak chho te pawh hi an ni e, te pawh hian an ti a ni. Chuvangchuan vawiina he Dan-Mizoram Co-operative Societies Act, 2006 Amendment kan sawi rual hian sorkarin kan society te kan zu hman tangkai dan hi chu ngaithuahna zau zawkin i ennawn teh ang u, mipui tana an tangkai dan te leh mipuite tana an rawngbawlnate hi a hlutzia te ngaihtuahin zau zawka kan hman thiam hi chu a tha a ni tih ka'n sawi duh a. Pu Speaker, he lai Dan ngau ngau hi chu ka thlawp lo tawp niloin a nghawng tur hi chu a lian a ni tih hi kan sawi duh a ni. Mithar tha tam tak rawn kal na kawng dangin, mihlui leh nihna chelh rei tawh te chance kan pe leh dawn tihna a nia, a lawmawm viau rualin ngaithuahna zau sengin; vawiina an rawn move na pawh hi ka rin dan chuan hotu sang lam nihna chelh rei tawh atangin nawrna nasa tak a awm a nih ka ring a. Nichina kan ngaihtlak ang khan, engpawhnise a nghawng chu a lian dawn a ni. Ka thlawp lo tawp hran lo e tih ka'n sawi duh a ni.

SPEAKER : Pass rawn dil tawh mai sela. Kan Minister zahawm tak i sawm ang.

Pi VANLALAWMPUII CHAWNGTHU : Pu Speaker, ka lawm e.

Member zahawm tak Er. Rinawma thahnemngaihna kha a lawmawm ka ti a, a thlawp lo chuang lova. Tin, hemi avang hian kum nga (5) cooling off period provision paihbo tumna a awm chuang lo a ni tih ka sawi duh a. Tin, han sawi zau em em tur kha a awm tawh chuang lova. Chuvangin, Pu Speaker, i phalna leh he House remtihna in he ka Bill, 'The Mizoram Co-operative Societies Amendment Bill, 2017', hi he House zahawm takah pass ka rawn dil e.

SPEAKER : A vawikhatnaah a zei mah mah a ni. Minister zahawm takin 'The Mizoram Co-operative Societies Amendment Bill, 2017' hi he House hian pass pui a rawn dil ta a. Remti in 'remti' ti ru le (MEMBERS : Remti). Rem tilo kan awm em? Awm loh chuan he House hian 'The Mizoram Co-Operative Societies Amendment Bill, 2017' chu lungual takin a pass ta e.

Pi VANLALAWMPUII CHAWNGTHU : Pu Speaker, he House zahawm tak leh i chungah kan Bill min pass pui avangin lawmthu ka sawi e.

SPEAKER : Tichuan, vawiina kan tihtur chu kan zo fel ta a. Kan chawl rih ang a, naktuk tahrik ni 15, Nilaini zing dar 10:30-ah kan kal khawm leh dawn nia.

Sitting adjourned.